

北史

卷六

T 2455/17

238

CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE


SEP. 20 1932

ChL 2455,17



十四

6



北史卷六十七

列傳第五十五

崔彥穆

楊纂

段永

令狐整

子熙

唐永

子瑾

柳敏

子昂

王士良

崔彥穆字彥穆清河東武城人魏司空安陽侯林之九世孫也曾
祖顓後魏平東府諮議參軍祖蔚遵從兄司徒浩之難南奔江左
仕宋為給事黃門侍郎汝南義陽二郡守延興初復歸於魏拜顓

哈佛大學漢和
圖書館珍藏印

禮

東川世鳳堂
氏書向印

川郡守因家焉後終於郢州刺史父幼位終永昌郡守隋開皇初
以獻皇后外曾祖追贈上開府儀同三司新州刺史彥穆幼明悟
神采卓然魏吏部尚書隴西李神雋有知人之鑒見而歎曰王佐
才也永安末除司徒府參軍事再遷大司馬從事中郎孝武西遷
彥穆時不得從大統三年乃與兄彥珍於成臯舉義因攻拔滎陽
禽東魏郡守蘇淑仍與鄉郡王元法威攻潁川斬其刺史李景道
卽拜滎陽郡守尋賜爵千乘縣侯十四年授散騎常侍司農卿時
軍國草創衆務殷繁周文乃引彥穆入幕府兼掌文翰及于謹伐
江陵彥穆以本官從平之周明帝初進驃騎大將軍開府儀同三
司俄拜安州刺史總管十二州諸軍事入爲御正大夫陳氏請敦
隣好詔彥穆使焉彥穆風韻閑曠器度方雅善玄言解談詭甚爲
江表所稱轉戶部中大夫進爵爲公天和三年聘齊還除金州刺

史總管七州諸軍事進位大將軍尋徵拜小司徒及宣帝崩隋文
帝輔政三方起兵以彥穆爲行軍總管與襄州總管王誼討司馬
消難軍次荊州總管獨孤永業有異志遂收而戮之及事平隋文
帝徵王誼入朝卽以彥穆爲襄州刺史總管六州諸軍事加授上
大將軍進爵東郡公頃之永業家自理得雪彥穆坐除名尋復官
爵開皇元年卒子君綽嗣君綽性爽簡博覽經史有父風大象末
丞相府賓曹參軍君綽弟君肅解巾道王侍讀大象末潁川郡守
楊纂廣寧人也父安仁魏朔州鎮將纂少慷慨有志略勇力兼人
年二十徙齊神武起兵於信都軍功稍遷武州刺史自以賞薄志
懷怨憤每歎曰大丈夫富貴何必故鄉若以妻子經懷豈不沮人
雄志大統初乃間行入關周文執纂手曰人所貴者忠義也所懼
者危亡也其能不憚危亡蹈茲忠義者今方見之於卿耳卽授征

南將軍大都督封永興縣侯從周文解洛陽圍經河橋芒山之戰
纂每先登軍中咸推其敢勇累遷驃騎大將軍開府儀同三司加
侍中進爵爲公賜姓莫胡盧氏俄授岐州刺史周孝閔帝踐祚進
爵宋熙郡公保定元年位大將軍改封隴東郡公除隴州刺史從
隋公楊忠東伐至并州而還天和六年進授柱國大將軍轉華州
刺史纂性質樸又不識文字前後莅職但推誠信而已吏人以其
忠恕頗亦懷之尋卒於州子睿位至上柱國漁陽郡公

段永字永賓其先遼西石城人晉幽州刺史疋殫之後也曾祖悞
仕魏黃龍鎮將因從高陸之河陽焉永幼有志操閭里稱之魏正
光末北鎮擾亂遂攜老幼避地中山後赴洛陽拜平東將軍封沃
陽縣伯青州人崔社客舉兵反永討平之進爵爲侯除左光祿大
夫時有賊魁元伯生西自嶠潼東至鞏洛屠陷城壁所在爲患孝

武遣京畿大都督疋婁昭討之昭請以五千人行永進曰此賊旣
無城柵唯以寇抄爲資取之在速不在衆也若星馳電發出其不
虞精騎五百足矣帝然其計於是命永代昭以五百騎倍道兼進
遂破平之及帝西遷永時不及從大統初乃結宗人潛謀歸欵密
與都督趙業等襲斬西中郎將慕容顯和傳首京師以功別封昌
平縣子徐州刺史從禽竇泰復弘農破沙苑並有戰功進爵爲公
河橋之役永力戰先登授南汾州刺史累遷驃騎大將軍開府儀
同三司賜姓爾綿氏廢帝元年授恒州刺史于時朝貢多其部人
謁永之日冠蓋盈路當時榮之周孝閔帝踐祚進爵廣城郡公歷
文瓜二州刺史戶部中大夫保定四年拜大將軍永歷任內外所
在頗有聲稱輕財好士朝野以此重焉天和四年授小司寇尋爲
右二軍總管率兵北道講武遇疾卒於賀葛城喪還武帝親臨贈

使持節柱國大將軍同華等五州刺史謚曰基子岌嗣位至儀同三司兵部下大夫

令狐整字延保敦煌人也本名延世爲西土冠冕曾祖嗣祖紹安官至郡守咸爲良二千石父蚪早以名德著聞仕歷瓜州司馬敦煌郡守郢州刺史封長城縣子魏大統末卒於家周文帝傷悼之遣使者監護喪事又救鄉人爲營墳壟贈龍驤將軍瓜州刺史整幼聰敏沈深有識量學藝騎射竝爲河右所推刺史魏東陽王元榮辟整爲主簿加盪寇將軍整進趣詳雅對揚辯暢謁見之際州府傾目榮器整德望嘗謂僚屬曰令狐延保西州令望方成重器豈州郡之職所可繫維但一日千里必基武步寡人當委以庶務畫諾而已頃之孝武西遷河右擾亂榮仗整防扞州境獲寧及鄧彥竊瓜據瓜拒不受代整與開府張穆等密應使者申徽執彥送

京師周文嘉其忠節表爲都督尋而城人張保又殺刺史成慶與涼州刺史宇文仲和構逆規據河西晉昌人呂興等復害郡守郭肆以郡應保初保等將圖爲亂慮整守義不從旣殺成慶因欲及整然人之望復恐其下叛之遂不敢害雖外加禮敬內甚忌整整亦僞若親附而密欲圖之陰令所親說保曰君與仲和結爲唇齒今東君漸逼涼州彼勢孤危恐不能敵若或摧勦則禍及此土宜分遣銳師星言救援二州合勢則東軍可圖然後保境息人計之上者保然之而未知所任整又令說保曰歷觀成敗在於任使所擇不善旋致傾危令狐延保兼資文武才堪統御若使爲將蔑不濟矣保納其計且以整父兄等竝在城中弗之疑也遂令整至玉門郡招集豪傑說保罪逆馳還襲之先定晉昌斬呂興進軍擊保州人素服整威名竝棄保來附保遂奔吐谷渾衆議推整爲刺史

整曰本以張保肆逆殺害無辜闔州之人俱陷不義今者同心務在除凶若其相推薦復恐效尤致禍於是乃推波斯使主張道義行州事具以狀聞詔以申徽爲刺史徵整赴闕授壽昌郡守封襄武縣男周文謂整曰卿早建殊勲今官位未足酬賞方當與卿共平天下同取富貴遂立爲瓜州義首整以國難未寧常願舉宗效力遂率鄉親二千餘人入朝隨軍征討整善於撫馭躬同豐約是以士衆並忘羈旅盡其力用周文嘗從容謂整曰卿遠祖立忠而來可謂積善餘慶世濟其美者也整遠祖漢建威將軍邁不爲王莽屈其子稱避地河右故周文稱之云累遷驃騎大將軍開府儀同三司加侍中周文又謂整曰卿勲同婁項義等骨肉立身敦雅可以範人遂賜姓宇文氏并賜名整焉宗人二百餘戶竝列屬籍周孝閔帝踐阼拜司憲中大夫處法平允爲當時所稱進爵彭城

縣公初梁興州刺史席固以州來附周文以固爲豐州刺史固莅職旣久猶習梁法凡所施爲多虧政典朝議密欲代之而難其選令整權鎮豐州委以代固之略整廣布威恩傾身撫接數月之間化洽州府於是除整豐州刺史以固爲湖州豐州舊不居民中賦役參集勞逸不均整請移居武當詔可其奏獎勵撫導遷者如歸旬月之間城府周備固之遷也其部曲多願留爲整左右整論以朝制弗之許焉莫不流涕而去及整秩滿代至人吏戀之老幼送整遠近畢集數日停留方得出界其得人心如此拜御正中大夫出爲中華郡守轉同州司會遷始州刺史整雅識情僞尤明政術恭謹廉慎常懼盈滿故歷居內外所在見稱進位大將軍晉公護之初執政也欲委整以腹心整辭不敢當頗忤其意護以此疎之及護誅附會者咸伏法而整獨保全時人稱其先覺卒贈本官加

四州諸軍事鄜州刺史謚曰襄子熙嗣

熙字長熙性嚴重有雅量雖在私室終日儼然不妄通賓客凡所交結必一時名士博覽羣書尤明三禮善騎射頗知音律起家以通經爲吏部上士轉夏官府都上士俱有能名以母憂去職殆不勝哀其父戒之曰大孝在於安親義不絕嗣吾今見存汝又隻立何得過爾毀頓貽吾憂也熙自是稍加饘粥服闋除少駕部復丁父憂非杖不起人有聞其哭聲莫不爲之下泣河陰之役詔令墨衰從事授職方下大夫襲彭城縣公及武帝平齊以留守功進位儀同歷司勳吏部一曹中大夫甚有當時譽隋文帝受禪之際熙以本官行納言事尋除司徒左長史加上儀同進爵河南郡公時吐谷渾寇邊以行軍長史從元帥元諧討之以功進上開府後拜滄州刺史在職數年風教大洽稱爲良二千石開皇四年上幸洛陽

熙來朝吏人恐其遷悲泣於道及還百姓出境迎謁歡叫盈路在州獲白鳥白麀嘉麥甘露降於庭前柳樹八年徙爲河北道行臺度支尚書吏人追思相與立碑頌德及行臺廢累遷鴻臚卿後以本官兼吏部尚書往判五曹尚書事號爲明幹上甚任之及上祠太山還次汴州惡其殷盛多有姦俠以熙爲汴州刺史下車禁游食抑工商人有向術開門者杜之船客停於郭外星居者勒爲聚落僑人逐令歸本其有滯獄並決遣之令行禁止上聞而嘉之顧侍臣曰鄴都天下難臨處敕相州刺史豆盧通令習熙法其年來朝考績爲天下之最賜帛三百疋頒告天下以領南夷數起亂徵拜桂州總管十七州諸軍事許以便宜從事刺史已下官得承制補授給帳內五百人帛五百疋發傳送其家累改封武康郡公熙至部大弘恩信其溪洞渠帥更相謂曰前總管皆以兵威相脇今

者乃以手教相諭我輩其可違乎於是相率歸附先是州縣生梗長吏多不得之官寄政於總管府熙悉遣之為建城邑開設學校人夷感化焉時有寧猛力者與陳後王同日生自言貌有貴相在陳世已據南海平陳後文帝因而撫之即拜安州刺史然驕倨恃險未常參謁熙手書論之申以交友之分其母有疾熙復遣以藥猛力感之詣府請謁不敢為非熙以州縣多有同名於是奏改安州為欽州黃州為峯州利州為智州德州為驩州東寧州為融州上皆從之在職數年上表以年老疾患請解所任優詔不許賜以醫藥熙奉詔令交州渠帥李佛子入朝佛子欲為亂請至仲冬上道熙意在羈縻遂從之有人詣闕訟熙受佛子賂而捨之上聞佛子反問至上大怒以為信然遣使鎖熙詣闕熙性素剛鬱鬱不得志行至永州憂憤病卒上怒不解沒其家財及行軍總管劉方禽

佛子送京師言熙實無贓上悟乃召其四子聽仕少子德榮最知名整弟休幼聰敏有文武材用與整同起兵逐張保授帥都督後為中外府樂曹參軍時諸功臣多為本州刺史晉公護謂整曰以公勲望應得本州但朝廷藉公委任無容遠出然公一門之內須有衣錦之榮乃以休為敦煌郡守在郡十餘年甚有政績卒於合州刺史

唐永北海平壽人也本居晉昌之憤安縣晉亂徙於丹陽祖揣始還魏官至北海太守因家焉父倫青州刺史永身長八尺少耿介有將帥才讀班超傳慨然有萬里之志正光中為北地太守當郡別將俄而賊將宿勤明達車金雀等寇郡境永擊破之境內稍安永善馭下士人競為之用臨陣常著帛展襦把角如意以指麾處分辭色自若在北地四年與賊數十戰未嘗敗北時人語曰莫陸

梁恐爾逢唐將永所營處至今猶稱唐公壘也行臺蕭寶寅表永
為南幽州刺史夷人送故者莫不垂淚當路遮留隨數日始得出
境大統元年拜東雍州刺史尋加衛將軍封平壽伯卒贈司空公
永性清廉家無蓄積妻子不免饑寒世以此稱之子陵少習武藝
頗閑吏職位大都督應州刺史車騎大將軍儀同三司陵子悟美
風儀博涉經史文詠可觀周大象中頗被宣帝任遇位至內史下
大夫漢陽公隋文帝得政廢於家而卒陵弟瑾

瑾字附璘性溫恭有器量博涉經史雅好屬文身長八尺二寸容
貌甚偉年十七周文聞其名乃貽永書曰聞公有二子曰陵曰瑾
陵從橫多武略瑾雍容富文雅可竝遣入朝孤欲委以文武之任
因召拜尚書員外郎相府記室參軍事軍書羽檄瑾多掌之從破
沙苑戰河橋並有功封姑臧縣子累遷尚書右丞吏部郎中于時

魏室播遷庶務草創朝章國典瑾並參之遷戶部尚書進位驃騎
大將軍開府儀同三司賜姓宇文氏時燕公于謹勲高望重朝野
所屬白周文言瑾學行兼修願與之同姓結為兄弟庶子孫承其
餘論有益義方周文歎異者久之更賜瑾姓万紐于氏謹乃深相
結納敦長幼之序瑾亦廷羅子孫行弟姪之敬其為朝望所宗如
此進爵臨淄縣伯轉吏部尚書銓綜衡流雅有人倫之鑒以父憂
去職尋起令視事時六尚書皆一時之秀周文自謂得人號為六
俊然瑾尤見器重于謹南伐江陵以瑾為元帥府長史軍中謀略
多出瑾焉江陵既平衣冠仕伍竝沒為僕隸瑾察其才行有片善
者輒議免之賴瑾獲濟者甚衆時論多焉及軍還諸將多因虜掠
大獲財物瑾一無所取唯得書兩車載之以歸或白周文曰唐瑾
大有輜重悉是梁朝珍玩周文初不信之然欲明其虛實密遣使

檢閱之唯見墳籍而已乃歎曰孤知此人來二十許年明其不以
利于義向若不令檢視恐常人有投杼之疑孤所以益明之耳凡
受人委任當如此也論平江陵功進爵爲公六官建授禮部中大
夫出爲蔡州刺史歷拓州硤州所在皆有德化人吏稱之轉荊州
總管府長史入爲吏部中大夫歷御正納言內史中大夫曾未十
旬遂遷四職搢紳咸以爲榮久之除司宗中大夫兼內史尋卒于
位贈小宗伯謚曰方瑾性方重有風格退朝休假烜著衣冠以對
妻子遇迅雷風烈雖閑夜宴寢必起冠帶端笏危坐又好施與家
無餘財所得祿賜常散之宗族其尤貧乏者又割膏腴田宅以振
之所留遺子孫者竝境墉之地朝野以此稱之撰新儀十篇所著賦
頌碑誄二十餘萬言孫大智嗣瑾次子令則性好篇章兼解音律
文多輕艷爲時人所傳天和初以齊馭下大夫使於陳大象中官

至樂部下大夫仕隋位太子左庶子皇太子勇廢被誅

柳敏字白澤河東解縣人晉太常純之七世孫也父懿魏車騎大
將軍儀同三司汾州刺史敏九歲而孤事母以孝聞性好學涉獵
經史陰陽卜筮之術靡不習焉年未弱冠起家員外散騎侍郎累
遷河東郡丞朝議以敏之本邑故有此授敏雖統御鄉里而處物
平允甚得時譽及周文尅復河東見而器異之乃謂之曰今日不
喜得河東喜得卿也卽拜丞相府參軍事俄轉戶曹參軍兼記室
每有四方賓客恒令接之爰及吉凶禮儀亦令監綜又與蘇綽等
修撰新制爲朝廷政典遷禮部郎中封武城縣子加帥都督領本
鄉兵俄進大都督遭母憂居喪旬日之間鬚髮半白尋起爲吏部
郎中毀瘠過禮杖而後起周文見而歎異之特加稟賜及尉遲迥
伐蜀以敏爲行軍司馬軍中籌略並以委之益州平進驃騎大將

軍開府儀同三司加侍中遷尚書賜姓宇文氏六官建拜禮部中大夫周孝閔帝踐阼進爵爲公又除河東郡守尋復徵拜禮部出爲郢州刺史甚得物情及將還朝夷夏士人感其惠政竝齋酒餼及物產候之於路敏乃從他道而還復拜禮部後改禮部爲司宗仍以敏爲之敏操履方正性又恭勤每日將朝必夙興待旦又久處臺閣明練故事近儀或非先典者皆案據舊章刊正取中遷小宗伯監修國史轉小司馬又監修律令進位大將軍出爲鄜州刺史以疾不之部武帝平齊進爵武德郡公敏自建德以後寢疾積年武帝及宣帝竝親幸其第問疾焉開皇元年進位上大將軍太子太保其年卒贈五州諸軍事晉州刺史臨終戒其子等喪事所須務從簡約其子等竝涕泣奉行少子昂

昂字千里幼聰穎有器識幹局過人周武帝時爲內史中大夫開

府儀同三司賜爵文城郡公當途用事百寮皆出其下昂竭誠獻替知無不爲謙虛自處未嘗驕物時論以此重之武帝崩受遺輔政稍被宣帝踈然不離本職隋文帝爲丞相深自結納文帝以爲大宗伯拜日遂得偏風不能視事文帝受禪疾愈加上開府拜潞州刺史昂見天下無事上表請勸學行禮上覽而善之優詔答昂自是天下州縣皆置博士習禮焉昂在州甚有惠政卒官子調歷秘書郎侍御史左僕射楊素嘗於朝堂見調因獨言曰柳條通體弱獨搖不須風調斂版正色曰調信無取公不當以爲侍御信有可取不應發此言公當具瞻之地樞機何可輕發素甚奇之煬帝嗣位累遷尚書左司郎中時王綱不正朝士多贓貨唯調清素守常爲時所美然幹用非其所長

王士良字君明其先太原晉陽人也後因晉亂避地涼州魏太武

平沮渠氏曾祖景仁歸魏爲敦煌鎮將祖公禮平城鎮司馬因家於代父延蘭陵郡守士良少修謹不妄交遊孝莊末爾朱仲遠啟爲府參軍事歷大行臺郎中諫議大夫封石門縣男後與紇豆陵步藩交戰軍敗爲藩所禽遂居河右僞行臺紇豆陵伊利欽其才擢授右丞妻以孫女士良旣爲姻好便得盡言遂曉以禍福伊利等卽歸附朝廷嘉之太昌初進爵晉陽縣子尋進爵琅邪縣侯授太中大夫右將軍出爲殷州車騎府馬東魏徙鄴之後置京畿府專典兵馬時齊文襄爲大都督以士良爲司馬領外兵參軍尋遷長史加安西將軍徙封符壘縣侯武定初除行臺右中兵郎中又轉大將軍府屬從事中郎仍攝外兵事王思政鎮潁川齊文襄率衆攻之授士良大行臺左丞加鎮西將軍進爵爲公令輔其弟演於并州居守齊文宣卽位入爲給事黃門侍郎領中書舍人仍總

知并州兵馬事加征西將軍別封新豐縣子俄除驃騎將軍尚書吏部郎中文宣自晉陽赴鄴宮復以士良爲尚書左丞統留後事仍遷御史中丞轉七兵尚書未幾入爲侍中轉殿中尚書頃之復爲侍中吏部尚書士良少孤事繼母梁氏以孝聞及卒居喪合禮文宣尋起令視事士良屢表陳誠再三不許方應命文宣見其毀瘠乃許之因此臥疾歷年文宣每自臨視疾愈除滄州刺史乾明初徵還鄴授儀同三司孝昭卽位遣三道使搜揚人物士良與尚書令趙郡王高歡太常卿崔昂分行郡國但有一介之善者無不以聞齊武成初除太子少傅少師復除侍中轉太常卿尋加開府儀同三司出爲豫州道行臺豫州刺史保定四年晉公護東伐權景宜以山南兵圍豫州士良舉城降授大將軍小司徒賜爵廣昌郡公尋除荊州總管行荊州刺史復入爲小司徒俄除鄜州刺史

轉荊州刺史士良去鄉既久忽臨本州耆老故人猶有存者遠近咸以為榮如授上大將軍以老病乞骸骨優詔許之開皇元年卒時年八十二子德衡大象末儀同大將軍

論曰昔陽貨外叛庶其竊邑而春秋譏之韓信背項陳平歸漢而史遷美之蓋以運屬既安君道已著則徇利忘德者罪也時逢擾攘臣禮未備則轉禍為福者可也崔彥穆楊纂段永等昔在山東沈淪下位竝以羈旅之士適回於燕雀之伍終佩龜組可謂是機者乎今狐整幹用確然雅望重於河右處州里則勲著方隅升朝廷則績宣出內而畏避權寵克保終吉不然何以自致顯名而取高位也熙歷職流譽風政克舉雖古之循吏亦何以加茲而毫釐為爽丘山成過唯命也夫唐永良能之名所在著美清白之譽顯於累職所謂幹能之士也瑾敏竝挺杞梓之材蘊瑚璉之器博觀

載籍多識舊章固乃國之名臣時之領袖周無君子斯焉取斯王士良之仕于齊職居卿牧而失忠與義臨難苟免其背叛之徒歟

豆盧寧字永安昌黎徒何人其先本姓慕容氏燕北地王肅之後也高祖勝以燕皇始初歸魏除長樂郡守賜姓豆盧氏或云北人謂歸義為豆盧因氏焉又云齊難攻為未詳孰是父長魏柔玄鎮將有威重兄稱於時武成中以寧勳追贈柱國大將軍少保涿郡公寧少號果有志氣身長八尺美姿容善騎射魏永安中以別將

北史卷六十八

列傳第五十六

豆盧寧

子勣

孫毓

楊紹

子雄

王雅

子世積

韓雄

子禽

賀若敦

子弼

弟誼

豆盧寧字永安昌黎徒何人其先本姓慕容氏燕北地王精之後也高祖勝以燕皇始初歸魏授長樂郡守賜姓豆盧氏或云北人謂歸義為豆盧因氏焉又云澹難改焉未詳孰是父萇魏柔玄鎮將有威重見稱於時武成中以寧勳追贈柱國大將軍少保涪郡公寧少驍果有志氣身長八尺姿容善騎射魏永安中以別將

豆盧寧
氏甫定

隨爾朱天光入關以破万俟醜奴以功賜爵靈壽縣男嘗與梁企
定遇於平涼川相與肄射乃相去百步縣莎草以射之七發五中
企定服其能贈遺甚厚天光敗從侯莫陳悅及周文討悅寧與李
弼來歸孝武西遷以奉迎勲封河陽縣伯後進爵爲公從禽竇泰
復弘農破沙苑除衛大將軍兼大都督大統七年從于謹破稽胡
帥劉平伏於上郡及梁企定反以寧爲軍司監隴右諸軍事賊平
進位侍中使持節驃騎大將軍開府儀同三司九年從周文迎高
仲密與東魏戰於芒山遷左衛將軍進爵范陽郡公十六年拜大
將軍羌帥傍乞鐵公及鄭五醜等反叛寧討平之恭帝二年改封
武陽郡公遷尚書右僕射周孝閔帝踐祚授柱國大將軍武成初
出爲同州刺史遷大司寇進封楚國公邑萬戶別食鹽亭縣一千
戶收其租賦保定四年授岐州刺史屬大兵東討寧輿疾從軍薨

於同州贈太保十州諸軍事同州刺史謚曰昭初寧未有子養弟
永恩子勛及生子讚親屬皆請讚爲嗣寧曰兄弟之子猶子也吾
何擇焉遂以勛嗣時以此多之及寧薨勛襲爵

勛字定東生時周文親幸寧家稱慶時遇新破齊軍周文因字曰
定東勛聰悟有器局初以勲臣子封義安縣侯周明帝受禪授稍
伯下大夫開府儀同三司改封丹陽郡公明帝時爲左武伯中大
夫勛自以經業未通請解職遊露門學帝嘉之敕以本官就學齊
王憲納勛妹爲妃恩禮愈厚武帝嗣位渭源燒當羌因饑作亂以
勛有才略拜渭州刺史甚有惠政華夷悅服大致祥瑞鳥鼠山俗
呼爲高武隴其下渭水所出其山絕壁千尋由來乏水諸羌苦之
勛馬足所踐忽飛泉涌出有白鳥翔止廳前乳子而後去有白狼
見於襄武人爲之謠曰我有丹陽山出玉漿濟我人夷神鳥來翔

百姓因號其泉曰玉漿泉後丁父艱毀瘁過禮襲爵楚國公大象二年累遷利州總管尋拜柱國隋文帝爲丞相益州總管王謙作亂勸嬰城固守謙將達奚慧等攻之起土山鑿城爲七十餘穴堰江以灌之勸時戰士不過二千晝夜相拒經四旬梁睿軍且至賊解去授上柱國賜一子爵中山縣公開皇中爲夏州總管帝以其家貴盛勲效克彰後爲漢王諒納其女爲妃恩遇彌厚七年追守利州功詔食始州臨津縣邑千戶十年以疾徵還京師詔諸王並至勸第中使顧問道路不絕卒諡曰襄子賢嗣位顯州刺史大理少卿武賁郎將次子毓

毓字道生少英果有氣節漢王諒出鎮并州毓以妃兄爲王府主簿以征突厥功授儀同三司及煬帝卽位諒納諮議王頗謀作亂毓苦諫不從因謂其弟懿曰吾匹馬歸朝自得免禍此乃身計非

爲國也今且僞從以思後計毓兄顯州刺史賢言於帝曰臣弟毓素懷志節必不從亂但逼兇威不能克遂臣請從軍與毓爲表裏諒不足圖也帝許之賢密遣家人齎敕書至毓所與之計諒將往介州令毓與總管屬朱濤留守毓與濤議拒之濤拂衣不從毓追斬之時諒司馬皇甫誕以諫被囚毓出之與協計及開府盤石侯宿勤武等閉城拒諒部分未定有人告諒攻之城陷見害時年二十八諒平贈大將軍封正義縣公諡曰愍子願師嗣拜儀同三司大業初行新令五等並除未幾帝復下詔改封雍丘侯復以願師襲

讚以寧勲建德初賜爵華陰縣侯累遷開府儀同大將軍進爵武陽郡公永恩少有識度與寧俱歸周文以迎孝武功封新興伯屢從征討皆有功進位驃騎大將軍開府儀同三司周孝閔帝踐祚

授鄆州刺史改封沃野縣公保定元年入爲司會中大夫寧封楚國公請以先封武陽郡三千戶益沃野之封詔許焉卒於官贈少保謚曰敬子通嗣

通字平東一名會弘厚有器局在周以父功賜爵臨貞縣侯改封沃野縣公位開府北徐州刺史開皇初進爵南陳郡公尚隋文帝妹昌樂縣長公主歷定相二州刺史夏洪二州總管竝以寬惠稱卒官謚曰安子寬嗣

楊紹字子安弘農華陰人也祖興魏新平郡守父國中散大夫紹少慷慨有志略屢從征伐力戰有功普泰初封平鄉縣男大統元年進爵冠軍縣公四年爲鄜城郡守紹性恕直兼有威惠百姓安之累遷驃騎大將軍開府儀同三司鄜州刺史賜姓叱呂引氏周孝閔帝踐祚進爲儼城郡公位八將軍卒贈成文等八州刺史謚

曰信子雄嗣

雄初名惠美姿容有器度雍容閑雅進止可觀周武帝時爲太子司旅下大夫帝幸雲陽宮衛王直作亂襲蕭章門雄逆拒破之封武陽郡公遷右衛上大夫大象初進爵邦國公隋文帝爲丞相雍州牧畢王賢構作難雄時爲別駕知其謀以告文帝賢伏誅以功授柱國雍州牧仍領相府虞候周宣帝葬備諸王有變令雄率六千騎送至陵所進位上柱國文帝受禪除左衛將軍兼宗正卿遷右衛大將軍參預朝政封廣平王以邦公別封一子雄請封弟士貴朝廷許之或奏高頰朋黨者帝言之於朝雄深明其虛帝亦以爲然雄時貴寵冠絕一時與高頰虞慶則蘇威稱爲四貴雄寬容下士朝野顧屬帝陰忌之不欲其典兵馬乃改授司空外示優崇而內實奪其權也雄乃閉門不通賓客尋改封清漳王仁壽初帝

以清漳不允聲望命職方進地圖指安德郡示羣臣曰此號足爲名德相稱乃改封安德王大業初授太子太傅元德太子薨檢校鄭州刺史遷懷州刺史京兆尹帝親征吐谷渾詔雄總管澆河道諸軍及還改封觀王遼東之役檢校左翊衛大將軍出遼東道次瀘河鎮遭疾薨帝爲之廢朝詔鴻臚監護喪事有司請謚曰懿帝曰王道高雅俗德冠生靈乃謚曰德贈司徒襄國等十郡太守子恭仁位吏部侍郎恭仁弟絃性和厚頗有文學歷義州刺史淮南郡太守及父薨起爲司隸校尉遼東之役楊玄感反其弟玄縱自帝所逃赴其兄路逢絃絃避人偶語久之司隸刺史劉休文奏之時恭仁將兵於外帝寢其事絃憂發病而卒

雄弟達字士達有學行仕周位儀同內史下大夫封遂寧縣男文帝受禪拜給事黃門侍郎進爵爲子遷兼吏部侍郎加開府轉內

史侍郎鄴鄭趙三州刺史俱有能名平陳後帝差品天下牧宰達爲第一擢拜工部尚書加上開府達爲人弘厚有局度楊素每曰有君子貌兼君子心者唯楊達耳獻皇后及文帝山陵制度達並參預焉煬帝嗣位轉納言領營東都副監遼東之役領右武衛將軍進位左光祿大夫卒於師贈吏部尚書始安侯謚曰恭

王雅字度容闡熙新閩人也少沈毅木訥寡言有膽勇善騎射周文聞其名召入軍以功賜爵居庸縣子從禽竇恭於潼關沙苑之戰雅謂所部曰彼軍殆有百萬今我不滿萬人常理論之實難與敵但相公神武以順討逆豈計衆寡大丈夫不以此時破賊何用生爲乃擐甲出戰所向披靡周文壯之又從戰芒山時大軍失利諸將皆退雅獨拒之敵人見其無繼步騎競進雅左右奮擊斬九級敵衆稍退雅乃還周文歎曰王雅舉身悉是膽也進爵爲伯累

遷驃騎大將軍開府儀同三司明帝初除汾州刺史勵精爲政人
庶悅附自遠至者七百餘家卒於夏州刺史子世積嗣

世積容貌魁岸腰帶十圍風神爽拔有人傑之表在周以功拜上
儀同封長子縣公隋文帝受禪進封宜陽郡公高頴美其才能甚
善之嘗謂頴曰吾輩俱周臣子社稷淪沒若何頴深拒之未幾授
蘄州總管平陳之役以舟師自蘄水趣九江以功進位柱國荊州
總管後桂州人李光仕作亂世積以行軍總管討平之進位上柱
國甚見隆重世積見帝性忌刻功臣多獲罪由是縱酒不與執政
言及時事上以爲有酒疾舍之宮內令醫者療之世積詭稱疾愈
始得就第及征遼東世積與漢王竝爲行軍元帥至柳城遇疾而
還拜涼州總管令騎士七百人送之官未幾其親信安定皇甫孝
諧有罪吏捕之亡抵世積不納由是有憾孝諧竟配防桂州事總

管令狐熙熙又不禮焉甚困窮因徵幸上變稱世積嘗令道人相
其貴不道人云當爲國主謂其妻曰夫人當爲皇后又將之涼州
其所親謂世積曰河西天下精兵處可圖大事世積曰涼州土曠
人稀非用武國由是被徵察其事有司奏左衛大將軍元旻右衛
大將軍元胄左僕射高頴竝與世積交通受其名馬之贈世積竟
坐誅旻胄等免官拜孝諧爲上大將軍

韓雄字木蘭河南東垣人也祖景孝文時爲赭陽郡守雄少敢勇
旅力絕人工騎射有將率材略及孝武西遷雄便慷慨有立功之
志大統初遂與其屬六十餘人於洛西舉兵數日間衆至千人與
河南行臺楊琚共爲犄角每抄掠東魏所向剋獲東魏洛州刺史
韓賢以狀聞鄴乃遣其軍司慕容紹宗與賢合勢討雄戰數十合
雄衆略盡兄及妻子皆爲賢所獲將以爲戮乃遣人告雄皆免之

雄乃詣賢軍即隨賢還洛潛引賢黨謀欲襲之事洩遁免謁周文於弘農封武陽縣侯遣還鄉里更圖進取雄乃招集義衆從獨孤信入洛陽芒山之役周文命雄邀齊神武於隘道神武怒命三軍并力取雄雄突圍得免除東徐州刺史東魏雍州刺史郭叔略接境頗爲邊患雄密圖之輕將十騎夜入其境伏於道側遣都督韓仕於略城服東魏人衣服詐若自河陽叛投關西者略出馳之雄自後射之再發威中遂斬略首除河南尹進爵爲公尋進驃騎大將軍開府儀同三司侍中河南邑中正周孝閔帝踐祚進爵新義郡公賜姓宇文氏明帝二年除都督中州刺史雄久在邊具知敵人虛實每率衆深入不避艱難前後經四十五戰雖時有勝負而雄志氣益壯東魏深憚之卒于鎮贈大將軍五州諸軍事謚曰威子禽嗣

禽字子通少慷慨以膽略稱容貌魁岸有雄傑之表性又好書經史百家皆略知大旨周文見而異之令與諸子遊集以軍功稍遷儀同三司襲爵新義郡公武帝伐齊禽說下獨孤永業於金墉城及平范陽加上儀同永州刺史隋文帝作相遷和州刺史陳將甄慶任蠻奴蕭摩訶等共爲聲援頻寇江北前後入界禽屢挫其鋒陳人奪氣開皇初文帝潛有吞江南志拜禽廬州總管委以平陳之任甚爲敵人所憚及大舉伐陳以禽爲先鋒禽領五百人宵濟襲採石守者皆醉遂取之進攻姑熟半日而拔次於新林江南父老素聞其威信來謁軍門晝夜不絕其將樊巡魯世真田瑞等相繼降晉王遣行軍總管杜彥與禽合軍陳叔寶遣領軍蔡徵守朱雀航聞禽將至衆懼而潰任蠻奴爲賀若弼所敗棄軍降禽禽以精騎直入朱雀門陳人欲戰蠻奴搗之曰老夫尚降諸君何事衆

散走遂平金陵執陳王叔寶時賀若弼亦有功乃下詔晉王曰
公者朕本委之悉如朕意以名臣之功成太平之業天下盛
事何用過此又下優詔於禽弼曰申國威於萬里宣朝化於一隅
使東南之人俱出湯火數百年賊旬日廓清專是公之功也高名
塞於宇宙盛業光於天壤逃聽前古罕聞其匹班師凱入誠知非
遠相思之盛寸陰若歲及至京弼與禽爭功於上前弼曰臣在蔣
山死戰破其銳卒禽其驍將震揚威武遂平陳國禽略不交陣豈
臣之比禽曰本奉明旨令臣與弼同取僞都弼乃敢先期逢賊遂
戰致將士傷死甚多臣以輕騎五百兵不血刃直取金陵降任蠻
奴執陳叔寶據其府庫傾其巢穴弼至夕方扣北掖門臣啟關而
納之斯乃救罪不暇安得與臣爲比上曰二將俱合上勲於是進
位上柱國賜物八千段有司劾禽縱士卒淫汙陳宮坐此不得國

公及真食邑大軍之始出也上敕有司曰亡國物我一不以入府
可於苑內築五堞當悉賜文武百官大射以取之及是上御玄堂
大陳陳之奴婢貨賄會王公文武官七品已上武職領兵都督已
上及諸考使以射之先是江東諸曰黃斑青驥馬發自壽陽溪來
時冬氣未去日春風始皆不知所謂禽本名禽武平陳之際又乘
青驥馬往返時節與歌相應至是方悟後突厥來朝上謂曰汝聞
江南有陳國天子乎對曰聞之上命左右引突厥詣禽前曰此是
執得陳國天子者禽勵然顧之突厥惶恐不敢仰視其威容如此
別封壽光縣公真食千戶以行軍總管屯金城禦備胡寇卽拜涼
州總管俄徵還京恩禮殊厚無何其隣母見禽門下儀衛甚盛有
同王者母異而問之其中人曰我來迎王忽不見又有人疾篤忽
驚走至禽家曰我欲謁王左右問何王曰閻羅王禽子弟欲撻之

禽止之曰生爲上柱國死作閻羅王亦足矣因寢疾卒于世謬嗣
世謬侷儻捷有父風楊玄感亂引爲將每戰先登玄感敗爲吏
所拘時帝在高陽送詣行在所世謬日令守者市酒散以酣暢揚
言曰吾死在朝夕不醉何爲漸以酒進守者守者狎之遂飲令醉
因得逃奔山賊不知所終禽母弟僧壽字玄慶亦以勇烈知名周
武帝時爲侍伯中旅下大夫隋文帝得政從韋孝寬平尉遲迥以
功授大將軍封昌樂縣公開皇初拜安州刺史時禽爲廬州總管
朝廷不欲其兄弟同在淮南轉熊蔚二州刺史進爵廣陵郡公尋
以行軍總管擊破突厥於雞頭山後坐事免數歲復拜蔚州刺史
突厥甚憚之後檢校靈州總管事從楊素破突厥進位上柱國改
封江都郡公煬帝卽位封新蔡郡公自是不復任用大業五年從
幸太原時有京兆人達奚通妾王氏能清歌朝臣多相命觀之僧

壽亦預焉坐除名尋命復位卒於京師子孝基

僧壽弟洪字叔明少驍勇善騎射力過人仕周以軍功拜大都
督隋文帝爲丞相從韋孝寬破尉遲迥加上開府封甘棠縣侯及
帝受禪進爵爲公開皇九年平陳之役授行軍總管及陳平晉王
廣大獵於蔣山有猛獸在圍中衆皆懼洪馳馬射之應弦而倒陳
氏諸將列觀皆歎伏焉王大喜賜縑百匹尋以功加柱國拜蔣州
刺史轉廉州時突厥屢爲邊患朝廷以洪驍勇令檢校朔州總管
事尋拜代州總管仁壽元年突厥達頭可汗犯塞洪率蔚州刺史
劉隆大將軍李藥王拒之遇虜於恒安衆寡不敵洪四面搏戰身
被重創將士沮氣虜悉衆圍之矢下如雨洪僞與虜和圍少懈洪
率所領潰圍而出死者大半殺虜亦倍洪及藥王除名隆竟坐死
煬帝北巡至恒安見白骨被野以問侍臣曰往者韓洪與虜戰處

也帝憫然傷之收瘞骸骨命五郡沙門爲設齋供拜洪隴西太守
不幾朱崖人王萬昌作亂詔洪平之以功加金紫光祿大夫領郡
如故俄而萬昌弟仲通復叛又詔洪平之還師未幾旋遇疾卒
賀若敦河南洛陽人也其先居漠北世爲部落大人曾祖貸魏獻
文時入國爲都官尚書封安富縣公祖伏連仕魏位雲州刺史父
統勇健不好文學以祖蔭爲祕書郎永安初從太宰元天穆討邢
杲以功封當亭子齊神武初起以統爲潁川長史執刺史田迅以
州降拜兗州刺史賜爵當亭縣公歷位北雍恒二州刺史卒贈司
空公謚曰哀敦少有氣幹統之將執田迅也慮事不果又以累弱
旣多難以自救沈吟者久之敦年十七進策贊成其謀統流涕從
之遂定謀歸西時羣盜蜂起大龜山賊張世顯潛來襲統敦挺身
赴戰手斬七八人賊乃走統大悅謂左右僚屬曰我少從軍旅戰

陣非一如此兒年時膽略未見其人非唯成我門戶亦當爲國名
將明年從河內公獨孤信於洛陽被圍敦彎三石弓箭不虛發信
乃言於周文引至麾下授都督封安陵縣伯嘗從校獵甘泉宮時
圍人不齊獸多越逸周文大怒人皆股戰圍內唯有一鹿俄亦突
圍而走敦躍馬馳之鹿上東山敦棄馬步逐至山半便乃掣之而
下周文大悅諸將因得免責累遷太子庶子廢帝二年拜右衛將
軍俄加驃騎大將軍開府儀同三司進爵廣鄉縣公時岷蜀初開
人情尚梗巴西人譙淹據南梁州與梁西江州刺史王開業共爲
表裏扇動羣蠻周文令敦討平之進爵武都郡公拜典祀中大夫
尋爲金州都督蠻帥向白彪向五子王等聚衆爲寇圍逼信州詔
敦與開府田弘赴救未至而城已陷乃進軍追討遂平信州是歲
荊州蠻帥文子榮自號仁州刺史復令敦與開府段韶討禽子榮

并虜其衆武成元年入爲軍司馬陳將侯瑱侯安都等圍逼湘州
遇絕糧援乃令敦度江赴救敦連戰破瑱乘勝遂次湘州俄而秋
水汎溢江路遂斷糧援既絕恐瑱等知其糧少乃於營內多爲聚
土覆之以米召側近村人陽有所訪問隨卽遣之瑱等聞之良以
爲實敦又增修營壘造廬舍亦以持久湘羅之間遂廢農業瑱等
無如之何初土人亟乘輕船載米粟及籠雞鴨以餉瑱軍敦患之
乃僞爲土人裝船伏甲士於中瑱軍人望見謂餉船之至逆來爭
取敦甲士遂禽之又敦軍數有叛人乘馬投瑱瑱輒納之敦又別
取一馬牽以趣船令船中逆以鞭鞭之如是者再三馬便畏船不
上後伏兵於江岸使人乘畏船馬以招瑱軍詐云投附瑱便遣兵
迎接競來牽馬馬旣畏船不上伏兵發盡殺之此後實有饋餉及
亡奔瑱者猶謂敦之詐並不敢受相持歲餘瑱等不能制求借船

送敦度江敦慮其詐或謂曰舍我百里當爲汝去瑱等遂留船於
是將兵去津路百里敦覘之非詐勒衆而還在軍病死者十五六
晉公護以敦失地無功除其名保定五年累遷中書刺史鎮函谷
敦恃功負氣顧其流輩皆爲大將軍敦獨未得兼以湘州之役全
軍而反翻被除名每出怨言晉公護怒徵還逼令自殺臨刑呼子
弼謂曰吾必欲平江南然心不果汝當成吾志吾以舌死汝不可
不思因引錐刺弼舌出血誠以慎口建德初追贈大將軍謚曰烈
弼字輔伯少有大志驍勇便弓馬解屬文博涉書記有重名周齊
王憲聞而敬之引爲記室封當亭縣公遷小內史與韋孝寬伐陳
攻拔數十城弼計居多拜壽州刺史改封襄邑縣公隋文帝爲丞
相尉遲迥作亂帝恐弼爲變遣長孫平馳驛代之及帝受禪陰有
平江南志訪可任者高頴薦弼有文武才幹於是拜吳州總管委

以平陳事弼忻然以爲已任與壽州總管源雄竝爲重鎮弼遣雄
書曰交河驃騎幕合浦伏波營勿使騏驎上無我二人名獻取陳
下策上稱善賜以寶刀開皇九年大舉伐陳以弼爲行軍總管將
度江酹酒呪曰弼親承廟略遠振國威若使福善禍淫大軍利涉
如事有乖違得壑江魚腹中死且不恨先是弼請緣江防人每交
代際必集歷陽於是大列旗幟營幕被野陳人以爲大兵至悉發
國中士馬旣知防人交代其衆復散後以爲常不復設備及此弼
以大軍濟江陳人弗覺襲陳南徐州拔之執其刺史黃恪軍令嚴
肅秋毫不犯有軍士於人間酤酒者弼立斬之進屯蔣山之白土
岡陳將魯廣達周智安任蠻奴田瑞孔範蕭摩訶等以勁兵拒戰
田瑞先犯擊走之魯廣達等相繼遞進弼軍屢却弼揣知其驕士
卒且隋於是奇厲將士殊死戰遂大破之麾下士開府員明禽摩

訶至弼命左右牽斬之摩訶顏色自若弼釋而禮之從北掖門入
時韓禽已執陳叔寶弼至呼叔寶視之叔寶惶懼流汗股慄再拜
弼謂曰小國之君當大國卿拜禮也入朝不失作歸命侯無勞恐
懼旣而弼志恨不獲叔寶於是與禽相詢挺刃而出令蔡徵爲叔
寶作降牋命乘騾車歸已事不果上聞弼有功大悅下詔褒揚之
晉王以弼先期決戰違軍命於是以弼屬吏上驛召之及見迎勞
曰尅定三吳公之功也命登御坐賜物八千段加位上柱國進爵
宋國公真食襄邑三千戶加寶劔寶帶金甕金盤各一并雉尾扇
曲蓋雜綵二千段女樂二部又賜陳叔寶妹爲妾拜右領軍大將
軍平陳後六年弼撰其書策上之謂爲御授平陳七策上弗省曰
公欲發揚我名我不求名公宜自載家傳七策其一請廣陵頓兵
一萬番代往來陳人初見設備後以爲常及大兵南伐不復疑也

其二使兵緣江時獵人馬喧噪及兵臨江陳人以為獵也其三以老馬多買陳船而匿之買弊船五六十艘於瀆內陳人覘以為內國無船其四積葦荻於楊子津其高蔽艦及大兵將度乃卒通瀆於江其五塗戰船以黃與枯荻同色故陳人不預覺之其六先取京口倉儲速據白土岡置兵死地故一戰而尅其七臣奉敕兵以義舉及平京口俘五十餘人便悉給糧勞遣付其敕書命別道宣喻是以大兵度江莫不草偃十七日之間南至林邑東至滄海西至象林皆悉平定轉右武侯大將軍弼時貴盛位望隆重其兄隆為武都郡公弟東萬榮郡公竝刺史列將弼家珍翫不可勝計婢妾曳綺羅者數百時人榮之弼自謂功名出朝臣之右每以宰相自許既而楊素為右僕射弼仍為將軍甚不平形於言色由是免官弼怨望愈甚後數載下弼獄上謂曰我以高頰楊素為宰相汝

每言此二人唯堪噉飯耳是何意也弼曰頰臣之故人素臣人舅子臣竝知其為人誠有此語公卿奏弼怨望罪當死上曰臣下守法不移公可自求活理弼曰臣恃至尊威靈將八千兵度江即禽陳叔寶竊以此望活上曰此已格外酬賞何用追論弼曰平陳之日諸公議不許臣行推心為國已蒙格外重賞今還格外望活既而上低徊者數日惜其功特令除名歲餘復其爵位上亦忌之不復任使然每宴賜遇之甚厚十九年上幸仁壽宮譙王公詔弼為五言詩詞意憤怨帝覽而容之明年春弼又有罪在禁所詠詩自若上數之曰人有性善行惡者公之為惡乃與行俱有三太猛嫉妬心太猛自是非人心太猛無上心太猛昔在周朝已教他兒子反此心終不能改邪他日上謂侍臣曰初欲平陳時弼謂高頰曰陳叔寶可平不作高鳥盡良弓藏邪頰曰必不然平陳後便索

內史又索僕射我語頗曰功臣正宜授勳官不可豫朝政弼後語
頌皇太子於已出口入耳無所不盡公終久何必不得弼力何脉
脉邪意圖鎮廣陵又求荊州總管竝是作亂處意終不改也後突
厥入朝上賜之射突厥一發中的上曰非弼無能當此乃命弼弼
再拜呪曰臣若赤誠奉國當一發破的如不然發不中也弼射一
發而中上大悅顧謂突厥曰此人天賜我也煬帝之在東宮嘗謂
曰楊素韓禽史萬歲三人俱良將也優劣如何弼曰楊素是猛將
非謀將韓禽是鬪將非領將史萬歲是騎將非大將太子曰然則
大將誰也弼拜曰唯殿下所擇弼意自許爲大將及煬帝嗣位尤
被疎忌大業三年從帝北巡至榆林時爲大帳下可坐數千人召
突厥啟人可汗饗之弼以爲太侈與高熲宇文弼等私議得失爲
人所告竟坐誅時年六十四妻子爲官奴婢羣從徙邊子懷亮慄

慨有父風以柱國世子拜儀同三司坐弼爲奴俄亦誅死敦弟誼
誼性剛果有幹略周文據關中引之左右累遷儀同三司略陽公
府長史周閔帝受禪封霸城縣子加開府歷原信二州總管及兄
敦以讒毀伏誅坐免官從武帝平齊拜洛州刺史進封建威縣侯
開皇中位左武侯將軍海陵郡公後以突厥爲邊患誼素有威名
拜靈州刺史進位柱國誼時年老猶能重鎧上馬甚爲北夷所憚
數載上表乞骸骨卒於家子舉襲爵

論曰周文帝屬禍亂之辰以征伐而定海內大則連兵百萬繫之
以存亡小則轉戰邊亭不闕於旬月是以兵無少長士無賢愚莫
不投筆要功橫戈請奮豆盧寧楊紹王雅韓雄等或攀翼雲漢底
績屯夷雖運移年代而名成終始美矣哉豆盧勣譽宣分竹毓節
見臨危可謂載德象賢也觀德王位登台袞慶流後嗣保茲寵祿

寔仁厚之所致乎王世積偽才雖多適足爲害者矣賀若敦志略慷慨深入敵境勅寇絕其糧道江淮沮其歸塗臨危而策出無方事迫而雄心彌厲故能利涉死地全師以反而茂勳莫紀嚴刑已及天下是以知宇文護之不能終其位也自南北分隔將三百年隋文爰應于齡將一函夏賀若弼慷慨由必取之長策韓禽奮發賈餘勇以爭先隋氏自此一戎威加四海循諸天道或時有廢興考之人謀實二臣之力其倣儻英略賀弼居多武毅威雄韓禽稱重方於晉之王杜勳庸綽有餘地然賀弼功成名立矜伐不已竟顛殞於非命亦不密以失身若念爰臨終之言必不及於斯禍韓禽累葉將家威聲動俗敵國旣破名遂身全幸也廣陵甘棠咸有武藝驍勇膽略竝爲當時所推越越干城難兄難弟矣

北史卷六十八 列傳第五十六

藝川屯鳳崗
氏庸而周生

北史卷六十九

藝川屯鳳崗
氏庸而周生

列傳第五十七

申徽

陸通

弟進

庫狄峙

楊荐

王慶

趙剛

子仲卿

趙昶

王悅

趙文表

元定

申徽字世儀魏郡人也六世祖鐘爲後趙司徒冉閔永中原喪亂鐘子邃避地江左曾祖爽仕宋位雍州刺史祖隆道宋北兗州刺史父明仁郡功曹早卒徽少與母居盡力孝養及長好經史性審慎不妄交游遭母憂喪畢乃歸於魏元顥入洛以元邃爲東徐州刺史邃引徽爲主簿顥敗邃被檻車送洛陽故吏賓客竝委去唯徽送之及邃得逸乃廣集賓友歎徽有古人風尋除太尉府行參軍孝武初徽以洛陽兵難未已遂間行入關見周文周文與語奇之薦之於賀拔岳岳亦雅相敬待引爲賓客周文臨夏州以徽爲記室參軍兼府主簿周文察徽沉密有度量每事信委之乃爲大行臺郎中時軍國草創幕府務殷四方書檄皆徽之辭也以迎孝武功封博平縣子本州大中正大統初進爵爲侯四年拜中書舍

人修起居注河橋之役大軍不利近侍之官分散者衆徽獨不離左右魏帝稱歎之十年遷給事黃門侍郎先是東陽王元榮爲瓜州刺史其女壻劉彥隨焉及榮死瓜州首望表榮子康爲刺史彥遂殺康而取其位屬四方多難朝廷不遑問罪因授彥刺史頻徵不奉詔又南通吐谷渾將圖叛逆周文難於動衆欲以權略致之乃以徽爲河西大使密令圖彥徽輕以五十騎行旣至止於賓館彥見徽單使不以爲疑徽乃遣一人微勸彥歸朝以揣其意彥不從徽又使贊成其住計彥便從之遂來至館徽先與瓜州豪右密謀執彥遂叱而縛之彥辭無罪徽數之曰君無尺寸之功濫居方岳之重恃遠背誕不恭貢職戮辱使人輕忽詔命計君之咎實不容誅但受詔之日本令相送歸闕所恨不得卽申明罰以謝邊遠耳於是宣詔慰勞吏人及彥所部復云大軍續至城內無敢動者

使還遷都官尚書十二年瓜州刺史成慶爲城人張保所殺都督
令狐延等起義遂保啟請刺史以徽信洽西土拜假節瓜州刺史
徽在州五歲儉約率下邊人樂而安之十六年徵兼尚書右僕射
加侍中驃騎大將軍開府儀同三司廢帝二年進爵爲公正右僕
射賜姓宇文氏徽性勤至凡所居官案牘無大小皆親自省覽以
是事無稽滯吏不得爲姦後雖歷公卿此志不懈出爲襄州刺史
時南方初附舊俗官人皆通侷遺徽性廉慎乃畫楊震像於寢室
以自戒及代還人吏送者數十里不絕徽自以無德於人慨然懷
愧因賦詩題於清水亭長幼聞之皆競來就讀遞相謂曰此是申
使君手迹竝寫誦之明帝以御正任總絲綸更崇其秩爲上大夫
員四人號大御正又以徽爲之歷小司空少保出爲荊州刺史入
爲小司徒小宗伯天和六年上疏乞骸骨詔許之薨贈泗州刺史

謚曰章子康嗣位瀘州刺史司織下大夫上開府康弟敦汝南郡
守敦弟靜齊郡守靜弟處上開府同昌縣侯卒

陸通字仲明吳郡人也曾祖載從宋武帝平關中軍還留載隨其
子義真鎮長安遂沒赫連氏魏太武平赫連氏載仕魏位中山郡
守父政性至孝其母吳人好食魚北土魚少政求之常苦難後宅
側忽有泉出而有魚遂得以供膳時人以其孝感所致因謂其泉
爲孝魚泉從今朱天光討伐及天光敗歸周文周文爲行臺以政
爲行臺左丞原州長史賜爵中都縣伯大統中卒通少敦敏好學
有志節幼從政在河西遂逢寇難明政相失通乃自拔東歸從余
朱榮榮死又從余朱光及余朱氏滅乃入關周文時在夏州引爲
帳內督填之賀拔岳爲侯莫陳悅所害時有傳岳軍府已亡散者
周文憂之通以爲不然居數日間至果如所策自是愈見親禮遂

晝夜陪侍家人罕見其面通雖處機密愈自恭謹周文以此重之
後以迎孝武功封都昌縣伯大統元年進爵爲侯從禽寶泰復弘
農沙苑之役力戰有功又從解洛陽圍軍還屬趙青雀反於長安
周文將討之以人馬疲弊不可速行又謂青雀等一時陸梁不足
爲慮乃云我到長安但輕騎臨之必當面縛通進曰青雀等旣以
大軍不利謂朝廷傾危同惡相求遂成反亂然其逆謀久定必無
遷善之心且其詐言大軍敗績東寇將至若以輕騎往百姓謂爲
信然更沮兆庶之望大兵雖疲弊精銳猶多以明公之威率思歸
之衆以順討逆何慮不平周文深納之因從平青雀錄前後功進
爵爲公徐州刺史以寇難未平留不之部與于謹討劉平伏加大
都督從周文援玉壁進儀同三司九年高仲密以地來附通從若
于惠戰于芒山衆軍皆退唯惠與通率所部力戰至夜中乃陰引

還敵亦不敢逼進授驃騎大將軍開府儀同三司大僕卿賜姓部
六孤氏進爵綏德郡公周孝閔踐祚拜小司空保定五年累遷大
司寇通性柔謹雖久處列位常清慎自守所得祿賜盡與親故共
之家無餘財常曰凡人患貧而不貴不患貴而不貧也建德元年
轉大司馬其年薨通弟逞字季明初名彥字世雄魏文帝嘗從容
謂之曰爾旣溫裕何因乃字世雄且爲世之雄非所宜也於爾兄
弟又復不類遂改焉逞少謹密早有名譽兄通先以軍功別授茅
土乃讓父爵中都縣伯令逞襲之起家羽林監周文內親信時輩
皆以驍勇自達唯逞獨兼文雅周文由此加禮遇焉大統十四年
參大丞相府軍事尋兼記室保定初累遷吏部中大夫歷蕃部御
伯中大夫進驃騎大將軍開府儀同三司徙授司宗中大夫轉軍
司馬逞幹識詳明歷任三府所在著績朝廷嘉之進爵爲公天和

三年齊遣侍中斛斯文略中書侍郎劉逖來聘初修隣好盛選行人詔逞爲使主尹公正爲副以報之逞美容止善辭令敏而有禮齊人稱焉還屆近畿詔令路車儀服郊迎而入時人榮之四年除京兆尹郡界有豕生數千經旬而死其家又有豨遂乳養之諸豚賴之以活時論以逞仁政所致俄遷司會中大夫出爲河州刺史晉公護雅重其才表爲中外府司馬頗委任之尋復爲司會兼納言遷小司馬及護誅坐免官頃之起爲納言又以疾不堪劇任及除宜州刺史故事刺史奉辭例備鹵簿逞以時屬農要奏請停之武帝深嘉焉詔遂其所請以彰雅操逞在州有惠政吏人稱之東宮初建授太子太保卒贈大將軍子操嗣

庫狄峙其先遼東人本姓段匹磾之後也因避難改焉後徙居代世爲豪右祖凌武威郡守父貞上洛郡守峙少以弘厚知名善騎射有謀略仕魏位高陽郡守政存仁恕百姓頗悅之孝武西遷峙乃棄官從入關大統元年拜中書舍人參掌機密以恭謹見稱遷黃門侍郎時與東魏爭衡蠕蠕乘虛屢爲邊患朝議欲結和親乃使峙往峙狀貌魁梧善於辭令蠕蠕主雅信重之自是不復爲寇周文謂峙曰昔魏絳和戎見稱前史以君方之彼有愧色封高邑縣公累遷驃騎將軍開府儀同三司拜侍中蠕蠕滅後突厥強盛雖與周通好而外連齊氏周文又令峙銜命喻之突厥感悟卽執齊使歸諸京師進爵安豐郡公歷小司空小司寇明帝初爲益州刺史都督三十一州諸軍事峙性寬和尚清靖爲夷獠所安後爲宜州刺史入爲少師以年老乞骸骨詔許之卒謚曰定子疑嗣少知名位開府儀同三司職方中大夫蔡州刺史卒官疑弟徽從平齊以功拜儀同大將軍賜爵樂陵縣公徽弟徽亦以軍功至儀同大將軍

保城縣男徽弟欽性弘厚有局度以齊右下大夫從武帝東伐入并州軍敗侍臣殲焉及帝之出唯欽侍從以功授上儀同大將軍遷開府歷右宮伯賜爵樂城縣侯仕隋位至戶部尚書

楊荐字承略秦郡寧夷人也父寶昌平郡守荐幼孤早有名譽性廉謹喜怒不形於色魏永安中隨介朱天光入關討羣賊封高邑縣男周文臨夏州補帳內都督及平侯莫陳悅使荐入洛請事孝武授周文關西大行臺仍除荐直閭將軍時馮翊長公主嫠居孝武意欲歸諸周文乃令武衛元毗喻旨荐歸白周文又遣荐入洛陽請之孝武卽許焉孝武欲向關中荐贊成其計孝武曰卿歸語行臺迎我周文又遣荐與長史宇文測出關候接孝武至長安進爵清水縣子大統元年蠕蠕請和親周文遣荐與楊寬使并結婚而還進爵爲侯又使荐納幣於蠕蠕魏文帝郁久閭后崩周文遣

僕射趙善使蠕蠕更請婚善至夏州聞蠕蠕貳於東魏欲執使者善懼乃還周文乃使荐往賜黃金十斤雜綵三百匹荐至蠕蠕責其背惠食言并論結婚之意蠕蠕感悟乃遣使隨荐報命焉及侯景來附周文令荐助鎮邊荐知景翻覆遂求還具陳事實周文乃遣使密追助景之兵尋而景叛十六年大軍東討周文恐蠕蠕乘虛寇掠乃遣荐往更論和好以安慰之進使持節驃騎大將軍開府儀同三司加侍中周孝閔帝踐阼除御伯大夫進爵姚谷縣公仍使突厥結婚突厥可汗弟地頭可汗阿史那庫頭居東面與齊通和說其兄欲背先約計謀已定將以荐等送齊荐知其意乃正色責之辭氣慷慨涕泗橫流可汗慘然良久曰幸無所疑當共平東賊然後發遣我女乃令荐先報命仍請東討以奉使稱旨遷大將軍保定四年又納幣於突厥還行小司馬又行大司徒從陳公

純等逆女於突厥進爵南安郡公天和三年遷總管梁州刺史後以疾卒

王慶字興慶太原祁人也父因魏靈州刺史懷德縣公慶少開悟有才略初從周文征伐復弘農破沙苑並有戰功每獲殊賞大統十年授殿中將軍周孝閔帝踐阼晉公護引為典籤慶樞機明辯漸見親待授大都督武成元年以前後功賜爵始安縣男二年行小賓部保定二年使吐谷渾與其分疆仍論和好之事渾主悅服遣所親隨慶貢獻初突厥與周和親許納女為后而齊人知之懼成合從之勢亦遣使求婚財饋甚厚突厥貪其重賂便許之朝議以魏氏昔與蠕蠕結婚遂為齊人離貳今者復恐改變欲遣使結之遂授慶左武伯副楊荐為使是歲遂與入并之夜慶乃引突厥騎與隋公楊忠至太原而還及齊人許送皇姑及世母朝廷遂與

通和突厥聞之復致疑阻於是又遣慶往諭之可汗感悅結好如初五年復與宇文貴使突厥逆女自此以慶信著北蕃頻歲出使後更至突厥屬其可汗暴殂突厥謂慶曰前後使來逢我國喪者皆勞面表哀況今二國和親豈得不行此事慶抗辭不從突厥見其守正卒不敢逼武帝聞而嘉之錄慶前後使功遷開府儀同三司兵部中大夫進爵為公歷丹中二州刺史為政嚴肅吏不敢犯大象元年授小司徒加上大將軍總管汾石二州五鎮諸軍事汾州刺史又除延州總管進位柱國開皇元年進爵平昌郡公卒于鎮贈上柱國謚曰莊子淹嗣

趙剛字僧慶河南洛陽人也祖寧魏高平太守父和太平中陵江將軍南討度淮聞父喪輒還所司將致之於法和曰罔極之恩終天莫服若許安厝禮畢而即罪戮死且無恨言訖號慟悲感傍人

主司以聞遂宥之喪畢除寧遠將軍大統初追贈膠州刺史剛少
機辯有幹能起家奉朝請累遷金紫光祿大夫領司徒府從事中
郎加閭內都督及孝武與齊神武構隙剛密奉旨召東荊州刺史
馮景昭未及發而神武已逼洛陽孝武西遷景昭集府僚文武議
其去就司馬馮道和請據州待北方處分剛抽刀投地曰公若爲
忠臣可斬道和如欲從賊可見殺景昭感悟遂率衆赴關右屬侯
景逼穰城東荊州人楊歡等起兵應景以其衆邀景昭於路景昭
戰敗剛遂沒於蠻後自贖免乃見東魏東荊州刺史李廙憐勸令
歸關西廙憐納之使剛至并州密觀事勢神武引剛內宴因令剛
賫書申款荊州剛還報廙憐仍說廙憐斬楊歡等以州歸西廙憐
乃使剛入朝大統初剛於潯上見周文具陳關東情實周文嘉之
封陽邑縣子論復東荊州改進爵臨汝縣伯初賀拔勝獨孤信以

孝武西遷之後竝流寓江左至是剛言於魏文帝請追而復之乃
以剛爲兼給事黃門侍郎使梁魏興賞移書與其梁州刺史杜懷
珪等卽與剛盟歆受移送建康仍遣人隨剛報命是年又詔剛使
三荆聽在所便宜從事使還稱旨進爵武成縣侯除大丞相府帳
內都督復使魏興重申前命尋而梁人禮送賀拔勝獨孤信等頃
之御史中尉董紹進策請圖梁漢以紹爲行臺梁州刺史剛以爲
不可而朝議已決遂出軍紹竟無功還免爲庶人除剛潁州郡守
高仲密以北豫州來附兼大行臺左丞持節赴潁川節度義軍師
還剛別破侯景前驅於南陸復獲其郡守二人時有流言傳剛東
叛神武因設反間聲遣迎接剛乃率騎襲其丁塢拔之周文知剛
無貳乃加賞焉除營州刺史進爵爲公渭州人鄭五醜構逆與叛
羗傍乞鐵忽相應令剛往鎮之將發魏文帝引見內寢舉觴屬剛

曰昔侯景在東爲卿所困黠羌小醜豈足勞卿謀慮也時五醜已
尅定夷鎮所在立柵剛至竝攻破之散其黨與五醜於是西奔鐵
忽剛又進破鐵忽僞廣寧郡屬宇文貴等西討詔以剛行渭州事
資給糧餼加驃騎大將軍開府儀同三司入爲光祿卿六官建拜
膳部中大夫周孝閔帝踐祚進爵浮陽郡公出爲利州總管沙州
氏恃險逆命剛再討復之方州生獠自此始從賦役剛以信州濱
江負阻乃表請討之詔剛率利沙等十四州兵往經略焉仍加授
渠州刺史剛初至渠帥憚其軍威相次降欵剛師出踰年士卒疲
弊尋復亡叛後遂以無功而還又與所部儀同尹才失和被徵赴
闕遇疾卒於路贈中浙涿三州刺史謚曰成子元卿弟仲卿
仲卿性麤暴有旅力周齊王憲甚禮之以軍功位上儀同爲畿伯
中大夫後以平王謙功進位大將軍封長垣縣公隋文帝受禪進

河北郡公尋拜石州刺史法令嚴猛織介之失無所寬捨鞭笞輒
至二百吏人戰慄無敢違犯盜賊屏息皆稱其能遷朔州總管時
塞北盛興屯田仲卿總統之微有不理者仲卿輒召王掌撻其胸
背或解衣倒曳於荆棘中時人謂之於菟事多克濟由是收穫歲
廣邊戍無餽運之憂會突厥啟人可汗求婚上許之仲卿因是聞
其骨肉遂相攻擊十七年啟人窘迫與臨使長孫晟投通漢鎮仲
卿率騎千餘援之達頭不敢逼潛遣人誘致啟人所部至者二萬
餘家其年從高穎指白道以擊達頭仲卿爲前鋒至族蠡山與虜
遇交戰七日大破之追奔至乞伏洎復啟人突厥悉衆而至仲卿
爲方陣四面拒戰經五日會高穎大兵至合擊之虜乃敗走追度
白道踰秦山七百餘里時突厥降者萬餘家上令仲卿處之恒安
以功進上柱國朝廷慮達頭掩襲啟人令仲卿屯兵二萬以備之

代州總管韓洪永康公李藥王蔚州刺史劉隆等將步騎一萬鎮恒安達頭來寇韓洪軍大敗仲卿自樂寧鎮邀擊斬千餘級明年督役築金河定襄二城以居啟人時有上表言仲卿酷暴上命御史王偉按之竝實惜其功不罪因勞之曰知公清正爲下所惡賜物五百段仲卿益恣由是免官仁壽初檢校司農卿蜀王秀之得罪奉詔往益州按之秀賓客經過處仲卿必深文致法州縣長吏坐者大半上以爲能賞奴婢二十口黃金二百兩米粟五千石奇琦雜物稱是煬帝嗣位判兵部工部二尚書事卒官謚曰肅子世弘嗣

趙昶字長舒天水南安人也曾祖襄仕魏至中山郡守因家於代焉昶少聰敏有志節弱冠以材力聞魏北中郎將高于鎮陝以昶爲長史中軍都督周文平弘農擢爲相府典籤大統九年大軍失

律於芒山清水氏酋李鼠仁白軍逃還憑險作亂周文將討之先求可使者遂命昶使焉見鼠仁喻以禍福羣酋或從或不從其命者復將加刃於昶而昶神色自若志氣彌厲鼠仁感悟遂相率降氏梁道顯叛攻南田周文復遣昶慰喻之道顯等皆卽款附東秦州刺史魏光因徙其豪帥三十餘人并部落於華州周文卽以昶爲都督領之先是汾州胡叛再遣昶慰勞之皆知其虛實及大軍往討昶爲先驅遂破之以功封章武縣伯十五年拜安夷郡守帶長蛇鎮將氏俗荒獷昶威懷以禮莫不悅服暮歲之後樂從軍者千餘人加授卽都督時屬軍機科發切急氏情難支復相率謀叛昶又潛遣誘說離間其情因其攜貳遂輕往臨之羣氏不知所爲咸來見昶乃收其首逆者二十餘人斬之餘衆遂定朝廷嘉之除大都督行南秦州事時氏帥蓋開等反昶復討平之又與史寧破

宕昌羌獠二十餘萬拜武州刺史恭帝初加驃騎大將軍開府儀同三司潭水羌叛殺武陵潭水二郡守昶率儀同駱天人等討平之周明帝初鳳州人仇周貢魏興等反自號周公破廣化郡攻沒諸縣分兵西入圍廣業修城二郡廣業郡守薛爽修城郡守杜果等請昶爲援遣使報果爲周貢黨樊伏興等所獲興等知昶將至解修城圍據泥功嶺設六伏以待昶昶至遂遇其伏合戰破之廣業之圍亦解昶追之至泥陽川而還興州人段吒及氏酋羌多復反攻沒郡縣昶討斬之昶自以破拔擢居將帥之任傾心下士虜獲氏羌撫而使之皆爲昶盡力周文常曰不煩國家士馬而能威服氏羌者趙昶有之矣至是明帝錄前後功進爵長道郡公賜姓宇文氏賞勞甚厚二年徵拜兵部中大夫行吏部尋以疾卒

王悅字衆喜京兆藍田人也少有氣幹爲州里所稱周文初定關

隴悅率募鄉里從軍屢有戰功大統元年除相府刑獄參軍封藍田縣伯四年東魏將侯景攻圍洛陽周文赴援悅又率鄉里千餘人從軍至洛陽將戰之夕悅罄其行資市牛饗戰士悅所部盡力斬獲居多遷大行臺右丞轉左丞又居管轄頗獲時譽三年侯景據河南來附仍請兵爲援周文先遣韋法保賀蘭願德等帥衆助之悅言於周文曰侯景之於高歡始則篤鄉黨之情末乃定君臣之契位居上將職重台司論其分義有同魚水今歡始死景便離貳豈不知君臣之道有違忠義之禮不足蓋其圖旣大不卹小嫌然尚能背德於高氏豈肯盡節於朝廷今若蓋之以勢援之以兵非唯侯景不爲池中之物亦恐朝廷貽笑將來也周文納之乃遣追法保等而景尋叛後拜京兆郡守散騎常侍遷大行臺尚書從達奚武征梁漢軍出武令悅說其城主楊賢悅乃貽之書賢於是

遂降悅又白武云白馬衝要是必爭之地今城守寡弱易可圖也若蜀兵更至攻之實難武然之卽令悅率輕騎徑趣白馬悅示其禍福梁將深愜遂以城降時梁武陵王蕭紀果遣其將任珍奇欲先據白馬行次關城聞其已降乃還及梁州平周文卽以悅行刺史事招攜初附入吏安之廢帝二年徵還本任屬改行臺爲中外府尚書員廢悅以儀同領兵還鄉里悅旣久居顯職及此之還私懷怏怏猶陵駕鄉里失於宗黨之情其長子康恃悅舊望遂自驕縱所部軍人將有婚禮康乃非理陵辱軍人訴之悅及康竝坐除名仍配遠防及于謹伐江陵令悅從軍展效江陵平因留鎮之周孝閔帝踐祚依例復官授郢州刺史尋拜使持節驃騎大將軍開府儀同三司大都督司水中大夫進爵藍田縣侯俄遷司憲中大夫賜姓宇文氏又進爵河北縣公性儉約不營生業雖出內榮顯家徒四壁而已明帝手敕勞勉之保定元年卒於位子康嗣官至司邑下大夫

趙文表其先天水西人也後徙居南鄭累世爲二千石父珏性方嚴有度量位御伯中大夫封昌國縣伯贈虞絳二州刺史謚曰貞文表少而修謹志存忠節起家爲周文親信累遷左金紫光祿大夫保定五年授畿伯下大夫遷許國公宇文貴府長史尋拜車騎大將軍儀同三司仍從貴使突厥迎皇后進止儀注皆令文表典之文表斟酌而行皆合禮度及皇后將入境突厥託以馬瘦徐行文表慮其爲變遂說突厥使羅莫緣曰后自發彼蕃已淹時序途經沙漠人馬疲勞且東寇每伺間隙吐谷渾亦能爲變今君以可汗愛女結姻上國曾無防慮豈人臣之體乎莫緣然之遂倍道兼行數日至甘州以迎后功別封伯陽縣伯天和三年除梁州總管

府長史所管地名恒稜者方數百里竝夷獠所居恃其險固常懷不軌文表率衆討平之遷蓬州刺史政尚仁恕夷獠懷之加驃騎大將軍開府儀同三司又加大將軍進爵爲公大象中拜吳州總管時開府毛顓爲吳州刺史及隋文帝執政尉遲迥等舉兵遠近騷然人懷異望顓自以秩大且爲國家肺腑懼文表負已謀欲先之乃稱疾不出文表往問之顓遂手刃文表因令其吏人告云文表謀反仍馳啟其狀帝以諸方未定恐顓爲變遂授顓吳州總管以安之後知文表無異志雖不罪顓而聽其子仁海襲爵

元定字願安河南洛陽人也祖比魏婺州刺史父道龍鉅鹿郡守定惇厚少言內沈審而外剛毅從周文討侯莫陳悅以功拜步兵校尉孝武西遷封高邑縣男定有勇略累從征伐每戰必陷陣然未嘗自言其功周文深重之諸將亦稱其長者累加驃騎大將軍

開府儀同三司進爵爲公廢帝二年以宗室進封建城郡王三年行周禮爵隨例改封長湖郡公周明帝初拜岷州刺史威恩兼濟甚得羌豪之情先時生羌據險不賓者至竝出山谷從征賦焉及定代還羌豪等咸戀慕之保定中授左宮伯中大夫久之轉左武伯中大夫進位大將軍天和二年陳湘州刺史華皎舉州歸梁梁王欲因其隙更圖攻取乃遣使請兵詔定從衛公直率衆赴之梁人與華皎皆爲水軍定爲陸軍直總督之俱至夏口而陳郢州堅守不下直令定圍之陳遣其將淳于量徐度吳明徹等水陸來拒皎爲陳人所敗直得脫身歸梁定旣孤軍懸隔進退無路陳人乘勝水陸逼之定乃率所部斫竹開路且戰欲趣湘州而湘州已陷徐度等知定窮迫遣使僞與定通和重爲盟誓許放還國定疑其詭詐欲力戰死之而定長史長孫隆及諸將等多勸定和定乃

許之於是與度等刑牲歃血解仗就船爲度所執所部衆軍亦被
囚虜送詣丹陽居數月憂憤發病卒子樂

楊惲字顯進正平高涼人也祖貴父猛竝爲縣令惲少豪俠有志
氣魏孝昌中尙朱榮殺害朝士大司馬城陽王元徽逃難投惲惲
藏而免之孝莊帝立徽乃出復爲司馬由是惲以義烈聞擢拜伏
波將軍給事中元顥入洛孝莊北度太行及尙朱榮奉帝南討至
馬渚惲乃具船以濟王師顥平封肥如縣伯加鎮遠將軍步兵校
尉行濟北郡事進都督平東將軍大中大夫從孝武入關進爵爲
侯加撫軍將軍銀青光祿大夫時東魏西遷周文欲知其所爲乃
遣惲間行詣鄆以觀察之使還稱旨授通直散騎常侍車騎將軍
稽胡恃險不賓屢行鈔竊以惲兼黃門侍郎往慰撫之惲頗有權
略能得邊情誘化酋渠多來款附乃有隨惲入朝者時弘農爲東

魏守惲從周文攻拔之然自河以北猶附東魏惲父猛先爲鄆郡
白水令惲與其豪右相知請微行詣鄆郡舉兵以應朝廷周文許
之惲遂行與土豪王覆憐等陰謀舉事密相應會內外俱發遂拔
郡會守程保及縣令四人竝斬之衆議推惲行郡事惲以因覆憐
成事遂表覆憐爲鄆郡守以功授大行臺左丞仍率義徒更爲經
略於是遣謀人誘說東魏城堡旬月之間正平河北南汾二絳建
州大寧等諸城竝有請爲內應者大軍因攻而拔之以惲行正平
郡事左丞如故齊神武敗於沙苑其將韓軌潘樂可朱渾元等爲
殿惲分兵要截殺傷甚衆東雍州刺史司馬恭懼惲威聲棄城遁
走惲遂移據東雍州周文以惲有謀略堪委邊任乃表行建州事
時建州遠在敵境然惲威恩風著所經之處多羸糧附之比至建
州衆已一萬東魏州刺史車折於洛出兵逆戰惲擊敗之又破其

行臺斛律俱於州西大獲甲仗及軍資以給義士由是威名大振東魏遣太保尉景攻陷正平復遣行臺薛修義與斛律俱相會於是敵衆漸盛擿以孤軍無援且腹背受敵謀欲拔還復恐義徒背叛遂僞爲周文書遣人若從外送來者云已遣軍四道赴援因令人漏泄使所在知之又分土人義酋令各領所部四出抄掠擬供軍費擿分遣訖遂於夜中拔還邵郡朝廷嘉其權以全軍卽授建州刺史時東魏以正平爲東雍州遣薛榮祖鎮之乃先遣奇兵急攻汾橋榮祖果盡出城中戰士於汾橋拒守其夜擿從他道濟遂襲尅之進驃騎將軍邵郡人以邵東叛郡守郭武安脫身走免擿又率兵攻而復之轉正平郡守又擊破東魏南絳郡虜其郡守屈僧珍錄前後功封邵陽縣伯芒山之戰擿攻拔栢谷塢因卽鎮之及大軍不利擿亦拔還而東魏將侯景率騎追擿擿與儀同韋法保

同心抗禦且戰且前景乃引退周文嘉之復授建州刺史鎮車箱擿久從軍役未及葬父至是表請遷葬詔贈其父車騎大將軍儀同三司晉州刺史贈其母夏陽縣君竝給儀衛州里榮之及齊神武圍玉壁別令侯景趣齊子嶺擿恐入寇邵郡率騎禦之景遠聞擿至斫木斷路者六十餘里猶驚尚不安遂退還河陽其見憚如此十二年進授大都督加晉建二州諸軍事又攻破蓼塢獲東魏將李顯進儀同三司尋加開府復鎮邵郡十六年大軍東討授大行臺尚書率義衆先驅敵境攻其四戍拔之時以齊軍不出乃追擿還改封華陽縣侯又於邵郡置邵州以擿爲刺史率所部兵鎮之保定四年遷少師其年大軍圍洛陽詔擿出軹關然擿自鎮東境二十餘年數與齊人戰每常克獲以此遂有輕敵之心時洛陽未下而擿深入敵境又不設備齊人奄至大破擿軍擿以衆敗遂

降於齊擿之立勲也有慷慨壯烈之志及軍敗遂就虜以求苟免
時論以此鄙之朝廷猶錄其功不以為罪令其子襲爵
論曰申徽局量深沉文之以經史陸通鑒悟明敏飾之以溫恭竝
夙奉龍顏早蒙任遇效宜提戟功預披荆義結周旋恩生契闊遂
得入居端揆出撫列藩雖以識用成名抑亦情兼惟舊陸逞於戎
旅之際以文雅見知出境播延譽之能莅官著從政之美歷居顯
要豈徒然哉庫狄峙建和戎之功楊荐成入關之策趙剛之克剪
凶狡趙昶之懷服氏羌王悅之料侯景文表之譎突厥或明稱先
覺或識表見機觀其立功立事皆一時志力之士也元定敗亡同
黃權之無路楊擿攻勝亦兵破而身囚功名寥落良可嗟矣易曰
師出以律否臧凶傳曰不備不虞不可以師其擿之謂也

北史卷六十九 列傳 第五十七 終

馬山宅圖
氏圖

北史卷七十

列傳第五十八

韓褒

趙肅 子軌

張軌

李彥

郭彥

梁昕

皇甫璠

辛慶之 族子昂

王子直

杜杲

馬山宅圖
氏圖

呂思禮

徐招

檀翥

孟信

宗慎

劉璠

子詳 兄子行本

柳遐

子莊

韓襄字弘業潁川潁陽人也祖瓌魏平涼郡守安定郡公父演恒州刺史襄少有志尚好學而不守章句其師恠問之對曰文字之間常奉訓誘至於商較異同請從所好師因此奇之及長涉獵經史深沉有遠略屬魏室喪亂避地夏州時周文帝為刺史素聞其名待以客禮及賀拔岳為侯莫陳悅所害諸將遣使迎周文周文

問以去留之計襄曰此天授也何可疑乎周文納焉及為丞相引為錄事參軍賜姓侯呂陵氏大統初遷行臺左丞賜爵三水縣伯丞相府從事中郎出鎮浙鄜居二年徵拜丞相府司馬進爵為侯出為北雍州刺史州帶北山多有盜賊襄密訪之竝豪右所為也而陽不之知厚加禮遇謂曰刺史起自書生安知督盜所賴卿等共分其憂耳乃悉召傑黠少年素為鄉里患者置為主帥分其地界有盜發而不獲者以故縱論於是諸被署者莫不惶懼皆首伏曰前盜發者竝某等為之所有徒侶皆列其姓名或亡命隱匿者亦悉言其所在襄乃取盜名簿藏之因大榜州門曰自知行盜者可急來首即除其罪盡今月不首者顯戮其身藉沒妻子以賞前首者旬日之間諸盜咸悉首盡襄取名簿勘之一無差異竝原其罪許以自新由是羣盜屏息入為給事黃門侍郎遷侍中除都督

西涼州刺史羌胡之俗輕貧弱尚豪富豪富之家侵漁百姓同於僕隸故貧者日削豪者益富襄乃悉募貧人以充兵士優復其家蠲免徭賦又調富人財物以振給之每西域商貨至又先盡貧者市之於是貧富漸均戶口殷實廢帝元年爲會州刺史後以驃騎大將軍開府儀同三司進爵爲公累遷汾州刺史先是齊寇數入人廢耕桑前後刺史莫能防扞襄至適會寇來乃不下屬縣人旣不備以故多備抄掠齊人喜於不覺以爲州先未集兵今還必不能追躡由是益懈不爲營壘襄已先勒精銳伏北山中外據險阻邀其歸路乘其衆怠縱伏擊之盡復其衆故事獲生口者竝送京師襄因是奏曰所獲賊衆不足爲多俘而辱之但益其忿耳請一切放還以德報怨有詔許焉自此抄兵頗息選河州總管仍轉鳳州刺史尋以年老請致事詔許之天和五年拜少保襄歷事三帝

以忠厚見知武帝深相敬重常以師道處之每入朝見必有詔令坐然始論政事卒贈涇岐燕三州刺史謚曰貞子繼伯嗣仕隋位終衛尉少卿

趙肅字慶雍河南洛陽人也世仕河西及沮渠氏滅曾祖武始歸於魏賜爵金城侯祖興中書博士父申侯舉秀才爲後軍府主簿肅早有操行知名於時孝昌中起家殿中侍御史累遷左將軍太中大夫東魏天平初除新安郡守秩滿還洛陽大統三年獨孤信東討肅率宗人爲鄉導授司州別駕監督糧儲軍用不置周文帝聞之謂人曰趙肅可謂洛陽主人也九年行華山郡事十三年除廷尉卿明年元日當行朝禮非有封爵者不得預焉肅時未有茅土左僕射長孫儉啟周文請之周文乃詔肅謂曰歲初行禮豈得使卿不預然何爲不早言也於是令肅自選封名肅曰河清乃太

平之應竊所願也於是封清河縣子十六年除廷尉卿加征東將軍肅久在理官執心平允凡所處斷咸得其情廉慎自居不營產業時人以此稱之十七年進位車騎大將軍儀同三司散騎常侍賜姓乙弗氏先是周文命肅撰法律肅積思累年遂感心疾去職卒於家子軌

軌少好學有行檢周葵王引爲記室以清苦聞隋文帝受禪爲齊州別駕有能名其東隣有桑甚落其家軌遣人悉拾還其主戒其諸子曰吾非以此求名意者非機杼物不願侵人汝等宜以爲戒在州考績連最持節使者郟陽公梁子恭上狀文帝賜以米帛甚優令人朝父老將送者各揮涕曰別駕在官水火不與百姓交是以不敢以盃酒相送公清如水請酌一盃水奉餞軌受飲之至京詔與牛弘撰定律令格式時衛王爽爲原州總管召爲司馬在道

夜行其左右馬逸入田中暴人禾軌駐馬待明訪知禾主酬直而去原州人吏聞之莫不改操後檢校硤州刺史甚有恩惠轉壽州總管長史芍陂舊有五門堰蕪穢不通軌勸課吏人更開三十六門灌田五千餘頃人賴其利秩滿歸卒於家子弘安弘智竝知名張軌字元軌濟北臨邑人也父崇高平令軌少好學志識開朗初在洛陽家貧與樂安孫樹仁爲莫逆之友每易衣而出以此見稱軌常謂所親曰秦雍之間必有王者余朱榮敗後遂杖策入朝賀拔恒以軌爲記室參軍典機密尋轉倉曹時穀糴踊貴或有請貸官倉者軌曰以私害公非吾宿志濟人之難詎得相忘遂賣所服衣物糴粟以振其乏及岳被害周文帝以軌爲都督從征莫陳悅悅平使於洛陽見領軍斛斯椿椿曰高歡逆謀已傳行路人情西望以日爲年未知宇文何如賀拔也軌曰宇文公文足經國武

足定亂至於高識遠度非愚管所測椿曰誠如卿言真可恃也周文爲行臺授軌郎中孝武西遷除中書舍人封壽張縣子兼著作佐郎修起居注遷給事黃門侍郎兼吏部郎中出爲河北郡守在郡三年聲績甚著臨人政術有循吏之美大統間言宰人者多推尚之入爲丞相府從事中郎行武功郡事章武公導出鎮秦州以軌爲長史廢帝元年進車騎大將軍儀同三司散騎常侍二年賜姓宇文氏行南秦州事恭帝二年徵拜度支尚書復除隴右府長史卒於位謚曰質軌性清素臨終之日家無餘財唯有書數百卷子肅周明帝初爲宣納上士轉中外府記室參軍中山公訓侍讀早有才名性頗輕狎時人比之魏諷卒以罪考竟終

李彥字彥士梁郡下邑人也祖光之魏淮南郡守父靜南青州刺史彥少有節操好學慕古孝建中解褐奉朝請孝武入關兼著作

佐郎修起居注大統初除通直散騎侍郎累遷左戶郎中十二年省三十六曹爲十二部改授戶部郎中封平陽縣子廢帝初拜尚書右丞轉左丞彥在尚書十有五載屬軍國草創庶務殷繁留心省閣未嘗懈怠斷決如流略無疑滯臺閣莫不歎其公勤服其明察遷給事黃門侍郎仍左丞賜姓宇文氏出爲鄜州刺史彥以東夏未平固辭州任詔許之拜兵部尚書加驃騎大將軍開府儀同三司仍兼著作六官建改授軍司馬進爵爲伯彥性謙恭有禮節雖居顯要於親黨之間恂恂如也輕財重義好施愛士時論以此稱之然素多疾而勤於莅職雖沈頓枕席猶理務不輟遂至於卒謚曰敬彥臨終遺誡其子等曰昔人以窾木爲積葛纍爲絨下不亂泉上不泄臭實吾平生之志也但事旣矯枉恐爲世士所譏今可斂以時服葬於磽磽之地勿用明器芻塗及儀衛等爾其念哉

朝廷嘉焉不奪其志子昇明嗣少歷顯職大象末太府中大夫儀同大將軍仕隋終於齊州刺史子仁政長安縣長義軍至以罪誅郭彥太原陽曲人也其先從宦關右遂居馮翊父胤靈武令彥少知名周文帝臨雍州辟爲西曹書佐累遷虞部郎中大統十二年初選當州首望統領鄉兵除帥都督以居郎官著稱封龍門縣子進大都督恭帝元年除兵部尚書仍以本兵從柱國于謹南伐江陵進驃騎大將軍開府儀同三司進爵爲伯六官建拜戶部中大夫周孝閔帝踐祚出爲澧州刺史蠻左生梗不營農業彥勸以耕稼人皆務本亡命之徒咸從賦役先是以澧州糧儲乏少每令荊州遞送自彥莅職倉庾克實無轉輸之勞齊南安城王馮顯密遣使歸降其衆未之知也柱國宇文貴令彥率兵應接時齊人先令顯率所部送糧南下彥懼其衆不從命乃於路邀之顯因得自拔

其衆果拒戰彥縱兵奮擊竝虜獲之以南安無備卽引軍掩襲遂有其城晉公護嘉之進爵懷德縣公入爲工部中大夫保定四年晉公護東討彥從尉遲迥攻洛陽迥復令彥與權景宣出汝南及軍次豫州使彥鎮之天和中爲隴右府總管府長史卒於官贈小司空宜鄜丹三州刺史

梁昕字元明安定烏氏人也世爲關中著姓其先因官徙居京兆之藍屋祖重耳涇縣令父勸儒中散大夫贈涇州刺史昕少溫恭見稱州里從爾朱天光征討拜右將軍太中大夫周文帝迎魏孝武軍次雍州昕以三輔望族上謁周文見昕容貌瓌偉深賞異之卽授右府長流參軍累遷丞相府主簿大統十二年除河南郡守遷東荊州刺史昕撫以仁惠蠻夷悅之封安定縣子周孝閔帝踐祚進位驃騎大將軍開府儀同三司明帝初進爵胡城縣伯天和

初拜工部中大夫出爲陝州總管府長史昕性溫裕有幹能歷官
內外咸著聲稱尋卒官贈大將軍謚曰貞昕弟榮位計部下大夫
開府儀同三司朝那縣伯贈涇寧豳三州刺史謚曰靜子獻仕隋
爲給事郎貞觀中終於鄭州刺史

皇甫璠字景瑜安定三水人也世爲西州著姓後徙居京兆父和
本州中從事大統末追贈散騎常侍儀同三司涇州刺史璠少忠
謹有幹略永安中辟州都督周文帝爲牧補主簿以勤事被知大
統四年引爲丞相府行參軍周孝閔帝踐祚爲守廟下大夫長樂
縣子保定中爲鴻州刺史入爲小納言累遷蕃部中大夫進驃騎
大將軍開府儀同三司璠性平和小心奉法安貞守志恒以清白
自處當時稱爲善人建德三年爲隨州刺史政存簡惠百姓安之
卒官贈交渭二州刺史謚曰恭子諒少知名大象中位史部下大

夫諒弟誕

誕字玄慮少剛毅有器局開皇中累遷治書侍御史朝臣無不肅
憚焉後爲尚書左丞時漢王諒爲并州總管朝廷盛選寮佐拜誕
并州總管司馬總府政事一以諮之諒甚敬焉及煬帝卽位諒用
諮議王頰謀發兵作亂誕數諫止諒不納誕因流涕以死固請諒
怒囚之及楊素將至諒屯清涼以拒之諒主簿豆盧毓出誕於獄
協謀閉城拒諒襲擊破之竝抗節遇害帝以誕亡身殉國嘉悼者
久之詔贈柱國封弘義公謚曰明子無逸嗣尋爲滄陽太守甚有
聲稱太業初令行舊爵例除以無逸誠義之後賜爵平輿侯入爲
刑部侍郎守右武衛將軍初漢王諒之反州縣莫不響應有嵐州
司馬陶世模繁時令敬釗竝抗節不從世模京兆人性明敏有器
幹仁壽初爲嵐州司馬諒反刺史喬鍾葵將赴之世模以義拒之

臨之以兵辭氣不撓鍾葵義而釋之軍吏請斬之於是被囚及諒
平拜開府授大興令從衛玄擊楊玄感以功進位銀青光祿大夫
釗字積善河東蒲坂人父元約周布憲中大夫釗仁壽中為繁峙
令甚有能名漢王諒反師陷其城賊帥墨弼執送偽將喬鍾葵署
為代州總管司馬釗正色拒之誓之以死會鍾葵敗釗遂免卒於
朝邑令

辛慶之字餘慶隴西狄道人也世為隴右著姓父顯宗馮翊郡守
贈雍州刺史慶之少以文學徵詣洛陽對策第一除祕書郎屬爾
朱氏作亂魏孝莊帝令司空楊津為北道行臺節度山東諸軍以
討之津啟慶之為行臺左丞與參謀議至鄴聞孝莊帝崩遂出竟
冀間謀結義徒以赴國難尋而節閔帝立乃還洛陽及賀拔岳為
行臺復啟慶之為行臺吏部郎大統初從周文帝東討為行臺左

丞六年行河東郡事九年入為丞相府右長史兼給事黃門侍郎
除度支尚書復行河東郡事遷南荊州刺史加儀同三司慶之位
遇雖隆而率性儉素車馬衣服亦不尚華侈志量淹和有儒者風
度特為當時所重又以其經明行修令與盧誕等教授諸王廢帝
二年拜祕書監卒官子加陵王寢上士慶之族子昂
昂字進君數歲便有成人志行有善相人者謂其父仲略曰公家
雖世載冠冕然名德富貴未有及此兒者仲略亦重昂志氣深以
為然年十八侯景辟為行臺郎中景後來附昂遂入朝除丞相府
行參軍後追論歸朝勲封襄城縣男及尉遲迥伐蜀昂占募從軍
蜀平迥表昂為龍州長史領龍安郡事州帶山谷舊俗生梗昂威
惠洽著吏人畏而愛之成都一方之會風俗舛雜迥以昂達於從
政復表昂行成都令昂到縣便與諸生祭文翁學堂因共歡宴謂

諸生曰子孝臣忠師嚴友信立身之要如斯而已若不事斯語何以成名各宜自勉克成令譽昂言切理至諸生等竝深感悟歸而告其父老曰辛君教誡如此不可違之於是井邑肅然咸從其化遷梓潼郡守六官建入爲司隸上士襲爵繁昌縣公保定二年爲小吏部時益州殷阜軍國所資經塗艱險每苦劫盜詔昂使於益梁軍人之務皆委決焉昂撫導荒梗頗得寧靜天和初陸騰討信州蠻詔昂便於通渠等州運糧饋之時臨信楚合等諸州人庶多從逆昂諭以禍福赴者如歸乃令老弱負糧壯夫拒戰莫有怨者使還屬巴州萬榮郡人反叛圍郡城昂於是遂募通開二州得三千人倍道兼行出其不意又令其衆皆作中國歌直趣賊壘謂有大軍赴救望風瓦解朝廷嘉其權以濟事詔梁州總管杞國公亮卽於軍中賞昂奴婢二十口繒綵四百疋又以昂威信布於宕渠

遂表爲渠州刺史轉通州推誠布信甚

夷獠歡心秩滿還京首

領皆隨昂詣闕朝覲以昂化洽夷落進

和驛騎大將軍開府儀同

三司時晉公護執政昂稍被護親待武

帝頗益之及誅護加之擢

楚因此遂卒昂族人仲景好學有雅量

其高祖欽後趙吏部尚書

雍州刺史子孫因家焉父歡魏隴州刺

史朱陽公仲景年十八舉

文學對策高第拜司空府主簿建德中

位內史下大夫開府儀同

三司卒於家子衡

王子直字孝正京兆杜陵人也世爲郡

右族父琳州主簿東雍州

長史子直性節儉有幹能魏正光中州

辟主簿起家奉朝請永安

初拜鴻臚少卿孝武西遷封山北縣男

大統初漢熾屠各阻兵於

南山與隴東屠各共爲唇齒周文帝令

子直率涇州步騎五千討

破之賜書勞問除尚書左外兵郎中兼

中書舍人從解洛陽圍經

河橋戰兼尚書左丞出爲秦州總管府司馬時涼州刺史宇文仲
和據州逆命子直從隴右大都督獨孤信討平之復入爲大行臺
郎中兼丞相府記室除太子中庶子領齊王友尋行馮翊郡事慶
帝元年拜使持節大都督行瓜州事務以德政化人西土悅附恭
帝初徵拜黃門侍郎卒官子宣禮柱國府參軍

杜杲字子暉京兆杜陵人也祖建魏輔國將軍贈蒙州刺史父皎
儀同三司武都郡守杲學涉經史有當世幹略其族父攢清貞有
識鑒深器重之常曰吾家千里駒也嘗時仕魏爲黃門侍郎兼慶
支尚書衛大將軍西道大行臺尚書
妹新豐公主因薦之朝廷
永熙三年起家奉朝請周明帝初爲修城郡守屬鳳州人仇周貢
等構亂攻逼修城杲信洽於人部內遂無叛者尋率郡兵與關府
趙昶合勢竝破平之入爲司會上士初陳文帝弟安成王頊爲質

於梁及江陵平頊隨例遷長安陳人請之周文帝許而未遣至是
帝欲歸之命杲使焉陳文帝大悅卽遣使報聘并賂黔中數州地
仍請畫野分疆永敦隣好以杲奉使稱旨進授都督行小御伯更
徃分界陳於是歸魯山郡帝乃拜頊大將軍詔杲送之還國
陳文帝謂杲曰家弟今蒙禮遣實是周朝之惠然不還魯山亦恐
未能及此杲答曰安成之在關中乃咸陽一布衣耳然是陳之介
弟其價豈止一城本朝親睦九族怨已及物上遵太祖遺旨下思
繼好之義所以發德音者蓋爲此也若知止倂魯山固當不貪一
鎮况魯山梁之舊地梁卽本朝藩臣若以始末言之魯山自合歸
國云以尋常之士易已骨肉之親使臣猶謂不可何以聞諸朝廷
陳文帝慙恧久之乃曰前言戲之耳自是接遇有加常禮及還引
升殿親降御座執手以別朝廷嘉之授大都督小載師下大夫行

小納言復聘於陳及華皎來附詔令衛公直都督元定等援之定等竝沒自是連兵不息東南搔動武帝授杲御正中大夫使陳論保境息人之意陳宣帝遣其黃門侍郎徐陵謂杲曰兩國通好彼朝受我叛人何也杲曰陳主昔在本朝非慕義而至主上授以柱國位極人臣子女玉帛備禮將送今主社稷孰謂非恩郝烈之徒邊人狂狡曾未報德而先納之今受華氏正是相報過自彼始豈在本朝陵曰彼納華皎志圖吞噬此受郝烈容之而已且華皎方州列將竊邑叛亡郝烈一百許戶脫身逃竄大小有異豈得司年而語乎杲曰大小雖殊受降一也若論先後本朝無失陵曰周朝送主上還國既以爲恩衛公共元定度江孰云非怨計恩與怨亦足相埒杲曰元定等軍敗身囚其怨已滅陳主負宸馮玉其恩猶在且怨由彼國恩起本朝以怨酬恩未之聞也陵笑而不答杲因

陳和通之便陵具以聞陳宣許之遂遣使來聘建德初授司城中大夫仍使於陳宣帝謂杲曰長湖公軍人等雖築館處之然恐不能無北風之戀王褒庾信之徒旣羈旅關中亦當有南枝之思耳杲揣陳宣意欲以元定軍將士易王褒等乃答之曰長湖總戎失律臨難苟免旣不死節安用此爲且猶牛之一毛何能損益本朝之議初未及此陳宣帝乃止及杲還至石頭又遣謂之曰若欲合從共圖齊氏能以樊鄧見與方可表信杲答曰合從圖齊豈唯弊邑之利必須城鎮宜待得之於齊先索漢南使臣不敢聞命還除司倉中大夫又使於陳杲有辭辯閑於占對前後將命陳人不能屈陳宣帝甚敬異之時元定已卒乃禮送開府賀拔華及定棺柩杲受之以歸除河東郡守遷温州刺史賜爵義興縣伯大象元年徵拜御正中大夫復使陳二年除申州刺史加開府儀同大將軍

進爵爲侯除同州刺史隋開皇元年以杲爲同州總管進爵爲公
俄遷工部尚書二年除西南道行臺兵部尚書尋以疾卒子運大
象未宣納上士杲兄長暉位儀同三司

呂思禮東平壽張人也性溫潤不雜交遊年十四受學於徐遵明
長於論難諸生爲之語曰講書論易鋒難敵十九舉秀才對策高
第除相州功曹參軍葛榮圍鄴思禮有守禦勲賜爵平陸縣伯除
樂城令普泰中僕射司馬子如薦爲尚書二千石郎中尋以地寒
被出兼國子博士乃求爲關西大行臺郎中與姚幼瑜茹文就俱
入關爲行臺賀拔岳所重專掌機密甚得時譽岳爲侯莫陳悅所
害趙貴等議遣赫連達迎周文帝思禮預其謀及周文爲關西大
都督以思禮爲府長史尋除行臺右丞以迎魏孝武功封汝陽縣
子加冠軍將軍拜黃門侍郎文帝卽位領著作郎除安東將軍都

官尚書兼七兵殿中二曹事從禽竇泰進爵爲侯大統四年以謗
訕朝政賜死思禮好學有才雖務兼軍國而手不釋卷晝理政事
夜卽讀書令蒼頭執燭燭盡夜有數升沙苑之捷命爲露布食頃
便成周文歎其工而且速所爲碑誄表頌竝傳於世七年追贈車
騎將軍定州刺史子亶嗣大象中位至駕部下大夫時有博陵崔
騰早有名譽歷職清顯爲丞相府長史亦以投書謗議賜死
徐招字思賢高平鄉人也世爲著姓招少好法律及朝廷舊事發
言措筆常欲辯析秋毫初入洛陽雖未登仕已爲時知朝廷疑事
多預議焉延昌中從征浮山堰有功賜爵高廣男及廣陽王深北
討鮮于修禮啟爲員外散騎侍郎深府長流參軍招陳策請離間
之葛榮竟殺修禮白爲魁帥以功進爵爲侯永安初射策甲科除
員外散騎常侍領尚書儀曹郎中招少習吏事未能精究朝儀常

恨才達恐名迹不立久之方轉二千石郎中爾朱榮死爾朱世隆屯兵河橋莊帝以招爲行臺左丞自武牢北度引馬場河內之衆以抗世隆後爾朱兆得招鎖送洛陽仲遠數招罪將斬之招曰不虧君命得死爲幸仲遠重之曰凡人受命理各爲主今若爲戮何以勸人臣乃釋之用爲行臺右丞及仲遠南奔招獨還洛永熙末從孝武入關中拜給事黃門侍郎兼尚書右丞時朝廷播遷典章遺闕至於臺省法式皆招所記論者多焉人統三年拜驃騎將軍侍中時文帝舅子王起化犯罪死有詔追贈招執奏正之後卒於度支尚書子山雲嗣

檀翥字鳳翔高平金鄉人也六世祖毓晉步兵校尉父江始還北仕至太常少卿贈兗州刺史翥十歲喪父還京師宅與營人雜居雖幼孤寒不與隣人往來好讀書解屬文能鼓琴早爲琅邪王誦

所知年十九以名家子爲魏明帝挽郎後客遊三輔時毛暹爲行臺鎮北維表翥爲行臺郎中莊帝旣誅爾朱榮還使翥詣京師因除著作佐郎郎中如故後孝武帝西幸除兼中書舍人修國史大統初又兼著作佐郎以守關迎駕勲封高堂子後坐談論輕躁爲黃門侍郎徐招所紕死於廷尉獄

孟信字修仁廣川索盧人也家世貧寒頗傳學業信常曰窮則變變則通吾家世傳儒學而未有通官當由儒非世務也遂感激棄書從軍永業末除奉朝請從孝武帝入關封東州子趙平太守政尚寬和權豪無犯山中老人曾以狔酒饋之信和顏接引殷勤勞問乃自出酒以鐵鐺温之素木盤盛蕪菁菹唯此而已文以一鐺借老人但執一盃各自斟酌申酬酢之意謂老人曰吾至郡來無人以一物見遺今卿獨有此餉且食菜已久欲爲卿受一狔樽耳

酒既自有不能相費老人大悅再拜犖純進之酒盡方別及去官
居貧無食唯有一老牛其兄子賣之擬供薪米券契已訖市法應知
牛主住在所信適從外來見買牛人方知其賣也因告之曰此牛
先來有病小用便發君不須也杖其兄子二十買牛人嗟異良久
呼信曰孟公但見與牛未必須其力也苦請不得乃罷買牛者周
文帝帳下人周文深歎異焉未幾舉爲太子少師後遷太子太傅
儒者榮之特加車騎大將軍儀同三司散騎常侍辭老請退周文
不奪其志賜車馬几杖衣服牀帳卒於家贈冀州刺史謚曰戴子
儒

宗懔字元懔南陽涅陽人也八世祖承永嘉亂討陳敏有功封柴
桑縣侯除宜都郡守卒官子孫因居江陵父高之梁山陰令懔少
聰敏好讀書晝夜不倦語輒引古事鄉里呼爲小兒學士梁大同

六年舉秀才以不及二官元會例不對策及梁元帝鎮荊州謂長
史劉之遴曰貴鄉多士爲舉一有意少年之遴以懔應命即日引
見令兼記室嘗父被召宿省使製龍川廟碑一夜便就詰朝呈上
梁元帝歎美之後歷臨汝建城廣晉三縣令遭母憂去職哭輒嘔
血兩旬之內絕而復蘇者三每旦有羣鳥數千集于廬舍候哭而
來哭止而去時論以爲孝感所致梁元帝卽位擢爲尚書侍郎封
信安縣侯累遷吏部尚書懔父高之先爲南臺書侍御史犯憲懔
願父釋罪當終身菜食高之理雪故懔菜食鄉里稱之在元帝府
府中多言其矯至是大進魚肉國子祭酒沛國劉歆讓之曰本知
卿不忠猶謂卿孝今日便是忠孝竝無懔不能對懔博學有才藻
口未嘗譽人朋友以此少之初侯景平後梁元帝議還建鄴唯懔
勸都渚宮以鄉在荊州故也及江陵平與王褒等入關周文帝以

懷名重南土甚禮之周孝閔帝踐祚拜車騎大將軍儀同三司明
帝卽位又與王褒等在麟趾刊定羣書數蒙宴賜保定中卒有集
二十卷行於世

劉璠字寶義沛人也六世祖敏以永嘉亂徙居廣陵父臧性方正
篤志好學居家以孝聞仕梁爲著作郎璠九歲而孤居喪合禮少
好讀書兼善文筆十七爲上黃侯蕭曄所器重范陽張綰梁之外
戚才高口辯見推於世以曄懿貴亦假借之璠年少未仕而負才
使氣不爲之屈綰嘗於新渝侯宅因酒後詎京兆杜某曰寒士不
遜璠厲色曰此坐誰非寒士璠本意在綰而曄以爲屬已辭色不
平璠曰何王之門不可曳長裾也遂拂衣而去曄謝之乃止後隨
曄在淮南璠母在建康遘疾璠弗之知嘗忽一日舉身楚痛尋而
家信至云其母病璠卽號泣戒道絕而又蘇當身痛之辰卽母死

之日居喪毀瘠遂感風氣服闋後一年猶杖而後起及曄終於毗
陵故吏多分散璠獨奉曄喪還都墳成乃退梁簡文時東宮遇曄
素重諸不送者多被劾責唯璠獨被優賞解褐王國常侍非好也
璠少慷慨好功名志欲立事邊城不樂隨牒平淮會宜豐侯蕭脩
出爲北徐州刺史卽請爲其輕車府主簿兼記室參軍修爲梁州
又補爲中記室補華陽太守屬侯景度江梁室大亂修以璠有才
略甚親委之時寇難繁興未有所定璠乃喟然賦詩以見志其末
章曰隨會平王室夷吾匡霸功虛薄無時用徒然慕昔風脩開府
置佐史以璠爲諮議參軍仍領記室梁元帝承制授樹功將軍鎮
西府諮議參軍賜書曰鄧禹文學尚或執戈葛洪書生且云破賊
前脩無遠屬望良深元帝尋以脩紹郟陽之封且爲雍州刺史復
以璠爲脩平北府司馬及武陵王紀稱制於蜀以璠爲中書侍郎

遣召璠使者入反乃至蜀又以為黃門侍郎令長史劉孝勝深布
心腹使工畫陳平度河歸漢圖以遺之璠苦求還中記室章登私
曰殿下忍而蓄憾足下不留將致大禍脫使盜遮於葭萌則卿殆
矣孰若共構大夏使身名俱美哉璠正色曰卿欲緩頰於我邪我
與府侯分義已定豈以寵辱夷險易其心乎丈夫立志當死生以
之耳殿下方布大義於天下終不逞志於一人紀知不為已用乃
厚贈而遣之臨別紀又解其佩刀贈璠曰想見物思人璠曰敢不
奉揚威靈尅剪姦宄紀於是遣使拜脩為益州刺史封隨郡王以
璠為府長史加蜀郡太守遠至白馬西屬達奚武軍已至南鄭璠
不得入城遂降武周文帝素聞其名先戒武曰勿使劉璠死故武
先令璠赴闕周文見之如舊謂僕射申徽曰劉璠佳士古人何以
過之徽曰晉人滅吳利在二陸明公今平梁漢得劉璠也時南鄭

尚拒守達奚武請屠之周文將許焉唯令全脩一家而已璠乃請
之於朝周文怒而不許也璠泣而固請移時不退柳仲禮侍側曰
此烈士也周文既納蕭脩降又許其反國脩至長安累月未之遣
也璠因侍宴周文曰我於古誰比曰常以公命世英主湯武莫逮
今日所見曾是齊桓晉文之不若周文曰我不得比湯武望於後
周為匹何桓文之不若乎對曰齊桓存三亡國晉文不失信於伐
原語未終周文撫掌曰我解爾意欲激我耳即命遣脩脩請與璠
俱還周文不許以璠為中外府記室遷黃門侍郎儀同三司嘗臥
疾居家對雪興感乃作雪賦以遂志焉初蕭脩在漢中與蕭紀牋
及答西魏書移襄陽文皆璠辭也周明帝初授內史中大夫掌綸
誥尋封平陽縣子在職清白簡亮不合於時左遷同和郡守璠善
於撫御莅職未期生羌降附者五百餘家前後郡守多經營以致

貲產唯璠秋毫無所取妻子並隨羌俗食麥衣皮始終不改洮陽
洪和二郡羌常越境詣璠訟理蔡公廣時鎮隴右嘉其善政及遷
鎮陝州欲啟璠自隨羌人樂從者七百人聞者莫不歎異陳公純
作鎮隴右引爲總管府司錄甚禮敬之卒於官著梁典三十卷有
集二十卷行於世子祥

祥字休徵幼聰慧賓客見者皆號神童事嫡母以至孝聞其伯父
黃門郎璆有名江左在嶺南聞而奇之乃令名祥字休徵後以字
行於世十歲能屬文十二通五經仕梁爲宜豐侯記室參軍江陵
平隨例入關中齊公憲召爲記室府中書記皆令掌之封漢安縣
子憲進爵爲王以休徵爲王友俄除內史上士武帝東征休徵陪
侍帷幄平齊露布卽休徵文也累遷車騎大將軍儀同大將軍歷
長安萬年二縣令頗獲時譽卒於官初璠所撰梁典始就未及刊

定而卒臨終謂休徵曰能成我志其在此書乎休徵修定繕寫勒
成一家行於世

行本璠兄子也父環仕梁歷職清顯行本起家梁武陵王國常侍
遇蕭脩以梁州北附遂與叔父璠歸周寓居新豐每以諷讀爲事
精力忘疲雖衣食乏絕宴如也性剛烈有不可奪之志周大象宰
宇文護引爲中外府記室武帝親總萬機轉御正中士兼領起居
注累遷掌朝下大夫周代故事天子臨軒掌朝典筆硯持至御坐
則承御大夫取進之及行本爲掌朝將進筆於帝承御復欲取之
行本抗聲曰筆不可得帝驚視問之行本曰臣聞設官分職各有
司存臣旣不得佩承御乃承御亦焉得取臣筆帝曰然因令二司
各行所職及宣帝嗣位多失德行本切諫忤旨出爲河內太守及
尉遲迥作亂攻懷州行本率吏人拒之拜儀同賜爵文安縣子隋

文帝踐祚拜諫議大夫檢校中書侍郎上嘗怒一郎於殿前笞之
行本進曰此人素清其過又小上不顧行本正當上前曰陛下不
以臣不肖令臣在左右臣言若是陛下安得不聽臣言若非當致
之於理安得輕臣而不顧臣所言非私因置笏於地而退上歛容
謝之遂原所笞者時天下大同四夷內附行本以党項羌密邈封
域最爲後服上表劾其使者曰臣聞南蠻遵校尉之統西域仰都
護之威此見西羌鼠竊狗盜不父不子無君無臣異類殊方於斯
爲下不悟羈縻之惠詎知含養之恩狼戾爲心獨乖正朔使人近
至請付推科上奇其志雍州別駕元肇言於上曰有一州吏受人
饋錢二百文律令杖一百然臣下車之始與其爲約此吏故違請
加徒一年行本駁之曰律令之行蓋發明詔今肇乃敢重其教命
輕忽憲章虧法取威非人臣之禮上嘉之賜絹百匹拜太子左庶

子領書侍御史如故皇太子虛襟敬憚時唐令則爲左庶子太子
昵狎之每令以弦歌教內人行本責之曰庶子當匡太子以正道
何嬖昵房帷之間哉令則甚慙而不能改時沛國劉臻平原明克
讓河南陸爽等並以文學爲太子所親行本怒其不能調護每謂
三人曰卿等正解讀書耳時左衛率長史夏侯福爲太子所昵嘗
於閣內與太子戲福大笑聲聞於外行本時在閣下聞之待其出
數之曰汝何小人敢爲褻慢因付執法者推之太子爲請乃釋之
太子嘗得良馬令福乘而觀之太子甚悅因欲令行本復乘行本
正色曰至尊置臣於庶子位欲輔導殿下以正道非爲殿下作弄
臣太子慙而止復以本官領大興令權貴憚其方正無敢至其門
者由是請託路絕吏人懷之未幾卒于官上甚傷惜之及太子廢
上曰嗟乎若使劉行本在勇當不及此乎行本無子

柳遐字子昇河東解人宋太尉元景從孫也祖叔珍義陽內史事見南史父季遠梁宜都太守遐幼而爽邁神彩嶷然髫歲便有成人之量篤好文學動合規矩其世父慶遠特器異之謂曰吾昔逮事伯父太尉公嘗謂吾云我昨夢汝登一樓甚峻麗吾以坐席與汝汝後名宦必達恨吾不及見耳吾向聊復晝寢又夢將昔時坐席還以賜汝汝之官位當復及吾特宜勉勵以應嘉祥也梁西昌侯藻鎮雍州遐時年十二以百姓禮修謁風儀端肅進止詳雅藻美之試遣左右踐遐衣裾欲觀其舉措遐徐步稍前曾不顧盼仕梁稍遷尚書功論郎陳郡謝舉時爲僕射引遐與語甚嘉之顧謂人曰江漢英靈見於此矣岳陽王蕭譽於襄陽承制授遐吏部郎賜爵聞喜公尋進位持節侍中驃騎大將軍開府儀同三司及譽踐帝位於江陵以襄陽來歸羅答曰陛下中興鼎業能飛舊楚臣

昔因幸會早奉名節理當以身許國期之始終自晉氏南遷臣宗族蓋寡從祖太尉世父儀同從父司空竝以位望隆重遂家于金陵唯留先臣獨守墳柏嘗誡臣等使不違此志今襄陽旣入北朝臣若陪隨鑾蹕進則無益塵露退則有虧先旨誓重違其志遂許之因留鄉里以經籍自娛周文帝明帝頻徵固辭以疾及晉祖遐舉哀行舊臣之服保定中又徵之遐始入朝授驃騎大將軍開府儀同三司霍州刺史遐導人務先以德再三不用命者乃微加貶異示恥而已其下感而化之不復爲過歲曰我君仁惠如此其可欺乎卒贈金安二州刺史遐有至行初爲州主簿其父卒于揚州遐自襄陽奔赴六日而至哀感行路毀悴不可識後奉喪西歸中流風起舟人相顧失色遐抱棺號慟天求哀俄須風止浪息其母嘗乳間發疽醫云此疾無可救理唯得人吮膿或望微止其痛

遐應聲卽吮旬日遂瘳咸以爲孝感所致性又溫裕略無喜愠之容弘獎名教未嘗論人之短尤尚施與家無餘財臨終遺誠薄塋其子等竝奉行之有十子靖莊最知名

靖字思休少方雅博覽墳籍仕梁正員郎隨遐入周授大都督歷河南德廣二郡守所居皆有政術吏人畏而愛之然性愛閑素其於名利澹如也及秩滿還鄉便有終焉之志隋文帝踐極特詔徵之以疾固辭優游不仕閉門自守所對唯琴書而已足不歷園庭殆將十載子弟奉之若嚴君焉其有過者靖必下帷自責於是長幼相率拜謝於庭靖然後見之勗以禮法鄉里亦慕而化之或有不善者皆曰唯恐柳德廣知也時論方之王烈前後總管到官皆親至靖家問疾遂以爲故事秦王俊臨州賚以几杖并致衣物靖唯受几杖餘竝固辭其爲當時所重如此開皇中壽終

莊字思敬少有器量博覽墳籍兼善辭令濟陽蔡大寶有重名於江左時爲岳陽王蕭詧諮議見莊歎曰襄陽水鏡復在於茲大寶遂以其女妻之俄而詧辟爲參軍及詧稱帝累遷鴻臚卿及隋文帝輔政蕭歸令莊奉書入關時三方構難文帝懼歸有異志及莊還謂曰孤昔以開府從役江陵深蒙梁王殊眷今主幼時艱猥蒙顧託梁主奕業重光委誠朝廷而今已後方見松筠之節君還申孤此意於梁主也遂執莊手而別時梁之將帥咸請與尉遲迥衡進可盡節於周氏退可席卷山南唯歸疑不可會莊至自長安申文帝結託之意遂言於歸曰今尉遲迥雖曰舊將昏耄已甚消難王謙常人之下者非有匡合之才況山東庸蜀從化日近周室之恩未洽於朝廷臣料之迥等終當覆滅隋公必私周國未若保境息人以觀其變歸深以爲然未幾消難奔陳迥及謙相次就戮

歸謂莊曰近若從衆言社稷已不守矣文帝踐祚莊又入朝帝深慰勉之及爲晉王廣納妃於梁莊因是往來四五反前後賜物數千段梁國廢授開府儀同三司除給事黃門侍郎莊明習舊章雅達政事凡所駁正帝莫不稱善蘇威爲納言重莊器識常奏帝云江南人有學業者多不習世務習世務者又無學業能兼之者不過柳莊高頰亦與莊甚厚莊與陳茂同官不能降意茂見上及朝臣多屬意於莊心每不平帝與茂有舊譖愬頗行尚書省嘗奏犯罪入依法合流而上處以大辟莊據法執之帝不從由是忤旨俄屬尚藥進丸藥不稱旨茂因奏莊不親監帝怒十一年徐璿等反於江南詔莊以行軍總管長史隨軍討之璿平卽授饒州刺史甚有能名卒於官

論曰韓褒奉事三帝以忠厚知名趙肅平允當官張軌循良播美李彥譽流省閣郭彥信著蠻貊歷官出納竝當時之選也梁昕皇甫璠辛慶之王子直杜杲之徒竝關右之舊族或紆組登朝獲當官之譽或張旌出境有專對之才旣茂國猷克隆家業美矣魏文帝云文人不護細行其呂思禮之謂乎徐檀翁孟信各以才學自業又加之以清介竝志能之士也宗慄才辭幹局見重梁元逮乎播越秦中不預政事豈亡國俘虜不與圖存者乎梁氏據有江東五十餘載挾筴紀事蓋亦多人劉璠學思通博有著述之譽雖傳疑傳信頗有詳略而屬辭比事爲一家之言行本正色抗言具存乎骨鯁柳遐立身之道進退有節觀其眷戀墳隴其孝可移於朝廷盡禮舊主其忠可事於新君夫能推此類以求賢則知人幾於易矣莊亮直之風不殞門表忠而獲謗蓋亦自古有之

北史卷七十一

列傳第五十九

隋宗室諸王

蔡景王整

滕穆王瓚

道宣王嵩

衛昭王爽

河間王弘

義城公處綱

離石太守子崇

文帝四王

煬帝三子

唐川山鳳閣
氏唐同印

蔡景王整隋文帝之次弟也文帝四弟唯整及滕穆王瓚與帝同
生次道宣王嵩次衛昭王爽竝異母整周明帝時以武元軍功賜
爵陳留郡公位開府車騎大將軍從武帝平齊力戰而死文帝初
居武元之憂率諸弟負土爲墳人植一栢四根鬱茂西北一根整
裁者獨黃後因大風雨并根失之果終不吉文帝作相贈柱國大
司徒八州刺史及受禪追封謚焉子智積襲又封其弟智明爲高
陽郡公智才開封縣公尋拜智積開府儀同三司授同州刺史儀
衛資送甚盛整娶同郡尉遲綱女生智積開皇中有司奏智積將
葬尉太妃帝曰昔幾殺我我有同生二弟竝倚婦家勢常憎疾我
我向之笑云爾旣嗔我不可與爾角嗔竝云阿兄止倚頭額時有
鑿師邊隱逐勢言我後一日當病癩二弟私喜以告父母父母泣謂
我曰爾二弟大劇不能愛兄我因言一日有天下當改其姓夫不

愛其親而愛他人者謂之悖德當改之爲悖父母許我此言父母
亡後二弟及婦又讒我言於晉公于時每還欲入門常不喜如見
獄門託以患氣常鎖閣靜坐唯食至時暫開閣每飛言入耳竊云
復未邪當時實不可耐羨人無兄弟世間貧家兄弟多相愛由相
假藉達官兄弟多相憎爭名利故也智積在同州未嘗嬉戲游獵
聽政之暇端坐讀書門無私謁有侍讀公孫尚義山東儒士府佐
楊君英蕭德言竝有文學時延於坐所設唯餅果酒纔三酌家有
女妓唯年節嘉慶奏於太妃前始文帝能潛時與景王不睦太妃
尉氏又與獨孤皇后不相諧以是智積常懷危懼每自貶損帝亦
以是哀憐之人或勸智積爲產業智積曰昔平原露朽財帛苦其
多也吾幸無可露何更營乎有五男止教讀論語孝經而已亦不
令交通賓客或問其故智積曰恐兒子有才能以致禍也開皇二

十年徵還京無佗職任闔門自守非朝覲不出煬帝卽位滕王綸
衛王集竝以讒構得罪高陽公智明亦以交通奪爵智積愈懼大
業三年授弘農太守委政察佐清靜自居及楊玄感作逆自東都
引軍而西智積謂官屬曰玄感欲西圖關中若成其計則根本固
矣當以計縻之使不得進不出一旬自可禽耳及玄感軍至城下
智積登陴詈辱之玄感怒甚留攻之城門爲賊所燒智積乃更蓋
火賊不得入數日宇文述等軍至合擊破之尋拜宗正卿十二年
從駕江都寢疾帝時疎薄骨肉智積每不自安及遇患不呼鑿臨
終謂所親曰吾今日始知得保首領沒於地矣時人哀之有子道
玄

滕穆王瓚字恒生一名慧仕周以武元軍功封竟陵郡公尚周武
帝妹順陽公主保定四年累遷納言瓚貴公子又尚公主美姿容

好書愛士甚有當時譽時人號曰楊三郎武帝甚親愛之平齊之
役諸王咸從留瓚居守謂曰六府事殷一以相付朕無西顧之憂
矣宣帝卽位遷吏部中大夫加上儀同宣帝崩文帝入禁中將總
朝政令廢太子勇召之瓚素與帝不協不從曰作陪國公恐不能
保何乃更爲族滅事邪文帝作相拜太宗伯典修禮律進位上柱
國邵國公瓚見帝執政恐爲家禍陰有圖帝計帝每優容之及受
禪立爲滕王拜雍州牧帝數與同坐呼爲阿三後坐事去牧以王
就第瓚妃宇文氏素與獨孤皇后不平至是鬱鬱不得志陰有呪
詛帝命瓚出之瓚不忍離絕固請帝不得已從之宇文氏竟除屬
籍由是恩禮更薄開皇十一年從幸栗園坐樹下方飲酒鼻忽流
血暴薨時年四十四人皆以爲遇鴆子綸嗣
綸字斌籍性弘厚美姿容頗知鍾律文帝受禪封邵國公明年拜

邵州刺史晉王廣納妃於梁詔綸致禮甚為梁人所敬綸以穆王故當文帝世每不自安煬帝即位尤被猜忌綸憂懼呼術者王姿問之姿答曰王相祿不凡滕即騰也此字足為善應有沙門惠思囑多等頗解占候綸每與交通嘗令此三人為厭勝法有人告綸怨望呪詛帝令黃門侍郎王弘窮驗之弘希旨奏綸厭蠱惡逆坐當死帝令公卿議之司徒楊素等曰綸懷惡之由積自家世惟皇運之始四海同心在於孔懷彌須叶力其先乃離阻大謀案同異父悖於前子逆於後為惡有將其罪莫大請依前科以皇族不忍除名徙邊郡大業七年帝征遼東綸欲上表請從軍自效為郡司所邀未幾徙珠崖及天下大亂為賊林仕弘逼攜妻子窟儋耳後歸國封懷化縣公尋病卒綸弟坦字之初封竟陵郡公坐綸徙長沙坦弟猛字武籀徙衡山猛弟溫字明籀初徙夷陵溫好

學解屬文既而作零陵賦以自寄其詞哀思帝見而怒之轉徙南海溫弟詵字弘籀前亦徙零陵帝以其修謹襲封滕王以奉穆王嗣大業末於江都為宇文化及所害

道宣王嵩在周以武元軍功賜爵興城公早卒文帝受禪追封謚焉以滕穆王瓚子靜襲卒謚曰悼無子以蔡王智積子世澄襲衛昭王爽字師仁小字明達在周以武元軍功於襁褓中封同安郡公六歲而武元崩為獻皇后所養由是寵愛特異諸弟年十七為內史上大夫文帝執政授蒲州刺史柱國及受禪立為衛王所生李氏為太妃爽位雍州牧領右軍大將軍權領并州總管上柱國涼州總管爽美風儀有器局政甚有聲大軍北伐河間王弘豆盧勣竇榮定高穎虞慶則等分道而進以爽為元帥俱受爽節度親率李充等四將出朔州遇沙鉢略可汗於白道接戰大破之沙

鉢略中重瘡而遁帝大悅賜爽真食梁安縣千戶六年復爲元帥步騎十五萬出合川突厥遁逃徵爲納言帝甚重之未幾爽疾帝使薛榮宗視之云衆鬼爲厲爽令左右驅逐之居數日有鬼物來擊榮宗走下階而斃其夜爽薨年二十五贈太尉冀州刺史于集嗣集字文會初封遂安王尋襲封衛王煬帝時諸侯王恩禮漸薄猜防日甚集憂懼乃呼術者俞普明章醮以祈福助有人告集呪詛憲司希旨鍛成其獄奏集惡逆坐當死詔下其議楊素等曰集密懷左道厭蠱君親是君父之罪人非臣子之所赦請論如律時滕王綸坐與相連帝不忍加誅除名遠徙邊郡天下亂不知所終

河間王弘字辟惡文帝從祖弟也祖愛敬早卒父元孫少孤隨母郭氏養於舅族及武元帝與周文建義關中元孫時在鄴懼爲齊人所誅因假外家姓爲郭氏元孫死齊爲周滅弘始入關與文帝

相得帝哀之爲買田宅弘性明悟有文武幹略數從征伐累遷開府儀同三司文帝爲丞相常置左右妾以心腹帝詣周趙王宅將及於難弘時立於戶外以衛文帝尋加上開府賜爵永康縣公及受禪拜大將軍進爵郡公尋贈其父柱國尚書令河間郡公其年立弘爲河間王拜右衛大將軍尋進柱國以行軍元帥出靈州道征突厥大破之拜寧州總管進上柱國政尚清靜甚有恩惠遷蒲州刺史得以便宜從事時河東多盜賊弘奏爲盜者百餘人投之邊喬州境恬然號爲良吏每晉王廣入朝弘輒領揚州總管及王歸藩弘復還蒲州在州十餘年風教大洽煬帝嗣位拜太子太保歲餘薨大業六年追封郇王子慶嗣慶傾曲善候時變帝猜忌骨肉滕王綸等皆被廢放唯慶獲全累遷滎陽太守頗有政績及李密據洛口倉滎陽諸縣多應密慶勒兵拒守歲餘城中糧盡兵勢

日蹙密遺慶書曰王之先世家在山東本姓郭氏乃非楊族婁敬之於漢高殊非血胤呂布之於董卓良異天親芝焚蕙闕歎事不同此江都荒洫流宕忘歸骨肉崩離人神怨憤舉烽火於驪山諸侯莫至浮膠船於漢水還日未期王獨守孤城援絕千里糧糒支計僅有月餘弊卒之多纔盈數百有何恃賴欲相抗拒求枯魚於市肆卽事非虛因歸雁以運糧竟知何日止恐禍生七首爨發蕭墻空以七尺之軀懸賞千金之購可爲酸鼻者也幸能三思自求多福于時江都敗問亦至慶得書遂降于密改姓爲郭氏密破歸東都又爲楊氏越王侗不之責也及侗稱制拜宗正卿世充旣僭僞號降爵爲郇國公後爲郭氏世充以兄女妻之署滎州刺史及世充將敗慶欲將妻同歸長安其妻曰國家以妾奉箕帚於公者欲以申厚意結公心耳今父窮迫家國阽危而不顧婚姻孤負

付屬爲全身之計非妾所能責公也妾若至長安公家一婢耳何用妾爲願送還東都君之惠也慶不許其妻遂沐浴覩莊仰藥而死慶遂歸國爲宜州刺史郇國公復姓楊氏其嫡母元太妃年老兩目喪明世充斬之

義城公處綱文帝族父也生長北邊少習騎射在周以軍功拜上儀同文帝受禪贈其父鍾葵柱國尚書令義城縣公以處綱襲焉累遷右領軍將軍綱雖無才藝而性質直在官強濟亦爲當時所稱拜蒲州刺史吏人悅之卒於秦州總管謚曰恭弟處樂官至洛州刺史漢王諒反朝廷以爲二心廢綱不齒

離石太守子崇武元帝族弟也父益生贈荊州刺史子崇少好學涉獵書記有風儀愛賢好士開皇初拜儀同以車騎將軍恒典宿衛後爲司門侍郎煬帝嗣位累遷候衛將軍坐事免未幾復檢校

將軍事從帝幸汾陽宮子崇知突厥必爲寇屢請早還京師不納尋有雁門之圍及賊退帝怒之曰子崇怯懦安有陳請驚動我衆心不可居瓜牙寄出爲離石郡太守有能名自是突厥屢寇邊塞胡賊劉六兒復擁衆劫掠郡境子崇表請兵鎮邊帝復大怒令子崇行長城子崇行百餘里四面路絕不得進而歸歲餘朔方梁師都馬邑劉武周等各作亂郡中諸胡復反子崇患之言欲朝集遂與心腹數百人自孟門關將還京師遇道路隔絕退歸離石左右聞太原兵起不復入城各叛去子崇悉收叛者父兄斬之後數日義兵至城中應之城陷爲離家所殺

文帝五男皆文獻皇后所生長曰房陵王勇次煬帝次秦孝王俊次庶人秀次庶人諒

房陵王勇小名覲地伐周世以武元軍功封博平縣侯及文帝輔

政立爲世子拜大將軍左司衛封長寧郡公出爲洛州總管東京少冢宰總統舊齊之地後徵還京師進上柱國大司馬領內史御正諸禁衛皆屬焉文帝受禪立爲皇太子軍國政事及尚書死罪已下皆令勇參決帝以山東人多流冗遣使案檢又欲徙人北實邊塞勇上書諫以爲戀土懷舊人之本情波迸流離蓋不獲已齊之末主闇時昏周平東夏繼以威虐人不堪命致有逃亡非厭家鄉願爲羈旅若假以數歲沐浴皇風逃竄之徒自然歸本雖北夷犯邊令所在嚴固何待遷配以致勞擾上覽而嘉之時晉王廣亦表言不可帝遂止是後時政不便多所損益帝每納之帝常從容謂羣臣曰前世皇王溺於嬖幸廢立之所由生朕傍無姬侍五子同母可謂真兄弟也豈若前代多諸內寵孽子忿爭爲亡國之道邪勇頗好學解屬詞賦性寬仁和厚率意任情無矯飾之行引

明克讓姚察陸開時等爲之賓友勇嘗文飾蜀鎧帝見而不悅恐致奢侈之漸因誡之曰我歷觀前代帝王未有奢華而能長久者汝當儲后若不上稱帝心下合人意何以承宗廟之重居兆人之上吾昔衣服各留一物時復看以自警戒又擬分賜汝兄弟恐汝以今日皇太子之心忘昔時之事故令高頰賜汝我舊所帶刀子一枚并菹醬一合汝昔作上士時所常食如此若存憶前事應知我心後經冬至百官朝勇張樂受賀帝知之問朝臣近聞至節內外百官相率朝東宮是何禮也大常少卿辛亶對曰於東宮是賀不得言朝帝曰改節稱賀正可三數十人逐情各去何因有司徵召一朝普集太子法服設樂以待之東宮如此殊乖禮制乃下詔曰皇太子雖居上嗣義兼臣子而諸方岳牧正冬朝賀任土作貢別上東宮事非典則宜悉停斷自此恩寵始衰漸生疑阻時帝

令選強宗入上臺宿衛高頰奏

強者恐東宮宿衛太劣帝

作色曰我有時行動宿衛須得雄毅太子毓德東宮左右何須強武始我商量恒於交番之日分向東宮下團伍不別豈非好事邪我熟見前代公不須仍踵舊風蓋疑頰勇尚勇女形於此言以防之勇多內寵昭訓雲氏嬖幸禮匹於嫡而妃元氏無寵嘗遇心疾二日而薨獻皇后意有他故甚責望勇又自妃薨雲昭訓專擅內政后彌不平頗求勇罪過晉王廣知之彌自矯飾姬妾恒備員數唯與蕭妃居處皇后由是薄勇愈稱晉王德行後晉王來朝車駕侍從皆爲儉素接朝臣禮極卑屈聲名籍甚冠於諸王臨還揚州入內辭皇后因哽咽流涕伏不能興皇后泫然泣下相對歔歔王曰臣性識愚下常守平生昆弟之意不知何罪失愛東宮恒畜盛怒欲加屠陷每恐讒譖出於杼軸鳩毒遇於盃杓皇后忿怒曰

覲地代漸不可耐闕我爲伊索得元家女望隆基業竟不聞作夫妻專寵阿雲有如許豚犬前新婦本無病痛忽爾暴亡遣人投藥致此天逝事已如此我亦不窮何因復於汝處發如此意我在尚爾我死後當魚肉汝乎每思東宮竟無正嫡至尊千秋萬歲後遣汝等兄弟向阿雲兒前再拜問訊此是幾許大苦痛邪晉王又拜嗚咽不能止皇后亦悲不自勝此別之後知皇后意移始構奪宗之計同引張衡定策遣廢公宇文述深交楊約令喻旨於越公素具言皇后此語素瞿然曰但不知皇后如何但如所言之旨又何爲者後數日素入侍宴微稱晉王孝悌恭儉有禮用此揣皇后意后泣曰公言是也我兒大孝順每聞至尊及我遣內使到必迎於境首又其新婦亦大可憐我使婢去常與同寢共食豈如覲地伐其阿雲相對而坐終日酣宴昵近小人疑阻骨肉我所以並憐阿

廢者嘗恐暗地殺之素既知意盛言太子不才皇后遂遺素金始有廢立之意勇頗知其事懼計無所出聞新豐人王輔賢能占候召而問之輔賢曰白虹貫東宮門太白襲月皇太子廢退象也以銅鐵五兵造諸厭勝又於後園內作廢人村屋宇卑陋太子時於中寢息布衣草褥冀以常之帝知其不安在仁壽宮使楊素觀勇素至東宮偃息未入勇束帶待之故亦不進以怒勇勇銜之形於言色素還言勇怨望恐有他變帝甚疑之皇后又遣人伺覘東宮纖介事皆聞奏因加媒孽構成其罪帝惑之遂疎忌勇迺於玄武門達至德門量置人候以伺動靜皆隨事奏聞又東宮宮衛人侍官已上名籍悉令屬諸衛府有健兒者咸屏去之晉王又令段達私貨東宮幸臣姬威令取太子消息密告楊素於是內外喧謗過失日聞段達脇姬威曰東宮罪過主上皆已知之已奉密詔定

當廢立君能告之則大富貴威遂許諾開皇二十年車駕至自仁壽宮御大興殿謂侍臣曰我新還京師應開懷歡樂不知何意翻悒然愁苦吏部尚書牛弘對曰由臣等不稱職故至尊憂勞帝旣數聞讒譖疑朝臣具妄故有斯問冀聞太子之愆弘旣此對大乖本指帝因作色謂東宮官屬曰仁壽宮去此不遠令我每還京師嚴備如入敵國我爲患利不脫衣臥夜欲得近厠故在後房恐有驚急還就前殿豈非爾輩欲壞我家國邪乃執唐令則等數人付所司訊鞫令楊素陳東宮事狀以告近臣素顯言之曰奉敕向京令皇太子檢校劉居士餘黨太子忿然作色肉戰淚下云居士黨已盡遣我何處窮討爾作右僕射受委自求何關我事又云昔大事不遂我先被誅今作天子竟乃令我不如弟一事已上不得自由因長歎回視云我大覺身妨又云諸王皆得奴獨不與我乃向

西北奮頭喃喃細語帝曰此兒不堪承嗣久矣皇后相勸我廢我以布素時生復長子望其漸改隱忍至今勇昔從南兖州來語衛王曰阿孃不與我一好婦女亦是可恨因指皇后侍兒曰皆我物此言幾許異事其婦初亡卽以斗帳安餘老嫗新婦初亡我深疑使馬嗣明藥殺我曾責之慙曰會當殺元孝矩此欲害我而遷怒耳初長寧誕育洪與皇后共抱養之自懷彼此連遣來索且雲定與女在外私合而生想此由來何必是其體胤昔晉太子取屠家女其兒卽好屠割今黨非類便亂宗祏又劉金麟佞人也呼定興作家翁定興愚人受其此語我前解金麟者爲其此事勇昔在宮引曹妙達共定興女司窈妙達在外云我今得勸妃酒直以其諸子偏庶畏人不服故逆縱之欲收天下望耳我雖德慙竟舜終不以萬姓付不肖子我恒思其加害如防大敵今欲廢之以安天

下左衛大將軍元旻諫曰廢立大事天子無貳言詔旨若行後悔無及讒言罔極惟陛下察又辭直事強聲色俱厲帝不答時姬威又表告太子非法帝使蓋言威對曰皇太子由來共臣語惟意在驕奢欲得樊川以至散關總規爲苑兼云昔漢武將起上林苑東方朔諫賜朔黃金百斤幾許可笑我寔無金輒賜此等若有諫者正當斬之不過殺百許人自然永息前蘇孝慈解左衛率皇太子奮髯揚肘曰大丈夫常有一口終不忘之法當快意又宮內所須尚書多執法不與便怒曰僕射已下五人會展三人脚便使知慢我之禍又於苑內築一小城春夏秋冬作役不輟營起亭殿朝更夕改每云至尊嗔我多側害高緯陳叔寶豈是孽子乎嘗令師姥卜吉凶語臣曰至尊忌在十八年此期促矣帝泫然曰誰非父母生乃至於此其何謂使婦女令東宮奏云勿令廣平王至

皇太子處東宮憎婦亦廣平王教之元贊亦知其陰惡勸我於左藏東加置兩隊初平陳後宮人好者悉配春坊如聞不知馱足於外更有求訪朕近覽齊書見高歡縱其兒子不勝忿憤安可效尤於是勇及諸子皆被禁錮部分收其黨與楊素舞文鍛鍊以成其獄勇由是遂敗居數日有司承素意奏元旻身備宿衛常曲事於勇情有附託在仁壽宮裴弘將勇書於朝堂與旻題封云勿令人見帝曰朕在仁壽宮有纖小事東宮必知疾於驛馬怪之甚久豈非此徒邪遣武士執旻及弘付法先是勇嘗於仁壽宮參起居還塗中見一枯槐樹根幹蟠錯大且五六圍顧左右曰此堪作何器用或對曰古槐尤堪取火於時衛士皆佩火燧勇因令匠者造數千枚欲以分賜左右至是獲於庫又藥藏局貯艾數斛亦搜得之大將爲怪以問姬威威曰太子此意別有所在比令長寧王已下

詣仁壽宮還每常急行一宿便至恒飼馬千匹云徑往捉城門自然餓死素以威言詰勇勇不服曰竊聞公家馬數萬匹勇忝備位太子有馬千匹乃是反乎素又發泄東宮服玩似加瑠飾者悉陳於庭以示文帝羣官爲太子罪帝曰前簿王世積得婦女領巾狀似稍幡當時徧示百官欲以爲戒今我兒乃自爲之領巾爲稍幡此是服祆使將諸物示勇以詰之皇后又責之罪帝使使問勇勇不服太史令袁充進曰臣觀天文皇太子當廢上曰玄象久見矣羣臣無敢言者於是使人召勇勇見使者驚曰得無殺我邪帝戎服陳兵御武德殿集百官立於東面諸親立於西面引勇及諸子列於殿庭命薛道衡宣詔廢勇及其男女爲王公王者並爲庶人命道衡謂勇曰爾之罪惡人神所棄欲求不廢其可得邪勇再拜曰臣合尸之都市爲將來鑒誠幸蒙哀憐得全性命言畢泣下流

襟旣而舞蹈而去左右莫不憫嘿又下詔左衛大將軍元旻任掌禁兵委以心膂乃包藏姦伏離間君親崇長厲階最爲魁首太子左庶子唐令則策名儲貳位長宮察諂曲取容音技自進躬執樂器親教內人贊成驕侈導引非法太子家令鄒文騰專行左道徧被親昵占問國家希覬災禍左衛率司馬夏侯福內事諂諛外作威勢陵侮上下褻濁宮闈典膳監元淹謬陳愛憎開示怨隙進引祆巫營事厭禱前吏部侍郎蕭子寶往居省閣舊非宮臣進畫姦謀要射營利前主璽下士何竦假託玄象妄說祆怪志圖禍亂心在速發兼諸奇服皆竦規模增長驕奢糜費百姓此之七人爲害斯甚竝處斬刑妻妾子孫皆沒官車騎將軍閻毗東郡公崔君綽游騎尉沈福寶瀛州人章仇太翼等四人所爲之事竝是悖逆論其狀迹罪合極刑但未能盡戮竝特免死各決杖一百身及妻子

資財田宅悉沒官副將作大匠高龍又預追番丁輒配東宮使役
營造亭舍進入春坊率更令晉文建通直散騎侍郎判司農少卿
事元衡料度之外私自出給虛破丁功擅割園地竝處自盡於是
集羣官于廣陽門外宣詔以戮之乃移勇於內史省給五品料食
立晉王廣爲皇太子仍以勇付之復囚於東宮賜楊素物三千段
元冑楊約竝千段楊難敵五百段皆勦勇之功賞也時文林郎楊
孝攻上書諫言皇太子爲小人所誤不宜廢黜帝怒撻其胸尋而
貴州長史裴肅表稱廢人罪黜已久當克已自新請封一小國帝
知勇黜不允天下請乃徵肅入朝具陳廢立意時勇自以廢非其
罪頻請見上面申冤屈皇太子過不得聞勇於是升樹叫聞於帝
冀得引見楊素因奏言勇情志昏亂又癩鬼所著不可復收帝以
爲然卒不得見帝遇疾於仁壽宮皇太子入侍監姦亂事聞於帝

帝抵牀曰枉廢我兒遣追勇未及發使而崩秘不發喪遽收柩逆
元巖繫大理獄僞敕賜庶人死追封房陵王不爲立嗣勇有十男
雲昭訓生長寧王儼平原王裕安城王筠高良娣生安平王巖襄
城王恪王良媛生高陽王該建安王韶成姬生賴川王嬰後宮生
孝實孝範初儼誕帝聞之曰此乃皇太孫何乃生不得地雲定興
奏曰天生龍種所以因雲而出時人以爲敏對六歲封長寧郡王
勇敗亦坐廢上表求宿衛辭情哀切帝覽之惻然楊素進曰伏願
聖心同於螻手不宜留意湯帝踐祚儼常從行遇鳩卒諸弟分徙
嶺外皆敕殺之

秦王俊字阿祗開皇元年立爲秦王二年拜上柱國河南道行臺
尚書令洛州刺史時年十二加右衛大將軍領關東兵三年遷秦
州總管隴右諸州盡隸焉俊仁恕慈愛崇敬佛道請爲沙門不許

六年遷山南道行臺尚書令伐陳之役爲山南道行軍元帥督三十總管水陸十餘萬屯漢口爲上流節度尋授揚州總管四十四州諸軍事鎮廣陵轉并州總管二十四州諸軍事初頗有令問文帝聞而大悅後漸奢侈違犯制度出錢求息帝遣按其事與相連坐者百餘人於是盛修宮室窮極侈麗後有巧思每親運斤斧工巧之器飾以珠玉爲妃作七寶纂籬重不可戴以馬負之而行徵役無已置渾天儀測景表又爲水殿香塗粉壁玉砌金堦梁柱楹棟之間周以明鏡間以寶珠極瑩飾之美每與賓客伎女絃歌於上俊頗好內妃崔氏性妬甚不平之遂於瓜中進毒俊由是遇疾徵還京師以俊奢縱免官以王就第左武衛將軍劉昇諫曰秦王非有他過但費官物營解舍而已臣謂可容帝曰法不可違昇固諫帝忿然作色昇乃止楊素復進諫以秦王過不應至此帝曰我

是五兒之父非兆人之父若如公意何不別制天子兒律以周公爲人尚誅管蔡我誠不及周公遠矣安能虧法乎卒不許俊疾篤含銀銀色變以爲遇蠱未能起遣使奉表陳謝帝責以失德大都督皇甫統上表請復王官不許歲餘以疾篤復拜上柱國二十年六月薨於秦邸帝哭之數聲而已曰晉王前送一鹿我今作脯擬賜秦王今亡可置靈坐之前心已許之不可虧信帝及后往視見大蜘蛛大蛛螻從枕頭出求之不見窮之知妃所爲也俊所爲侈麗物悉令焚之敕送終之具務從儉約以爲後世法王府寮佐請立碑帝曰欲求名一卷史書足矣何用碑爲若子孫不能保家徒與人作鎮石耳妃崔氏以毒王故下詔廢絕賜死於其家子浩崔氏所生也以其母譴死遂不得立於是以秦國官爲喪主俊長女永豐公主年十三遭父憂哀慕盡禮免喪遂絕酒肉每忌日輒流

北史七十一
涕不食有開府王延者性忠厚領俊親信兵十餘年俊甚禮之及
俊疾延恒在閣下衣不解帶俊薨勺飲不入口者數日羸頓骨立
帝聞憫之賜以御藥授驃騎將軍典宿衛俊薨日延號慟而絕帝
嗟異之令通事舍人弔祭詔葬延於俊墓側煬帝卽位立浩爲秦
王以奉孝王嗣封浩弟湛濟北侯後以浩爲河陽都尉楊玄感作
逆之際左翊衛大將軍宇文述勒兵討之至河陽修啟於浩浩詣
述營共相往復有司劾浩以諸侯交通內臣竟坐廢免宇文化及
弒逆立浩爲帝化及敗於黎陽北走魏縣自僭爲帝因而害之湛
驍果有膽烈大業初爲滎陽太守坐浩免亦爲化及所害

庶人秀開皇元年立爲越王未幾徙封於蜀拜柱國益州總管二
十四州諸軍事二年進上柱國西南道行臺尚書令本官如故歲
餘而罷十二年入爲內史令右領軍大將軍尋出鎮於蜀秀有膽

氣容貌瓌偉美鬚髯多武藝甚爲朝臣所憚帝每謂文獻皇后曰
秀必以惡終我在當無慮至兄弟必反兵部侍郎元衡使於蜀秀
深結於衡以左右爲請衡旣還京師請並左右帝不許大將軍劉
噲之討西襲帝令上開府楊武通將兵繼進秀使嬖人萬知先爲
武通行軍司馬帝以秀任非其人譴責之因謂羣臣曰壞我法者
必在子孫譬如猛獸物不能害反爲毛間蟲所損食耳於是遂分
秀所統秀漸奢侈違犯制度車馬被服擬於天子及太子勇廢秀
甚不平皇太子恐秀終爲後變陰令楊素求其罪狀而譖之仁壽
二年徵還京師見不與語明日使使切讓之皇太子及諸王流涕
庭謝帝曰頃者俊糜費財物我以父道訓之今秀蠹害生靈當以
君道繩之乃下以法開府慶整諫曰庶人勇旣廢秦王已薨陛下
兒子無多何至如是蜀王性甚耿介今被責恐不自全帝大怒欲

斷其舌因謂羣臣曰當斬秀於市以謝百姓乃令楊素蘇威牛弘
柳述趙綽推之太子陰作偶人書帝及漢王姓字縛手釘心令人
埋之華山下令楊素發之又作檄文曰逆臣賊子專弄威柄陛下
唯守虛器一無所知陳甲兵之盛云指期問罪置秀集中因以聞
奏帝曰天下寧有是邪乃廢爲庶人幽之內侍省不得與妻子相
見令給獠婢二人驅使之與連坐百餘人秀既幽逼憤懣不知所
爲乃上表陳已愆請與其愛子瓜子相見并請賜一穴令骸骨有
所帝乃下詔數其罪曰汝地居臣子情兼家國庸蜀險要委以鎮
之汝乃干紀亂常懷惡樂禍睨二宮佇望災釁容納不逞結構
異端我有不和汝便覘候望我不起便有異心皇太子汝兄也次
當建立汝假託妖言乃云不終其位妄稱鬼怪又道不得入宮自
言骨相非人臣德業堪承重器妄道清城出聖欲已當之詐稱益

州龍見託言吉兆重述木易之姓更修成都之宮妄說木乃之名
以當八千之運橫生京師妖異以證父兄之災妄造蜀地徵祥以
符己身之籙汝豈不欲得國家惡也天下亂也輒造白玉之經
爲白羽之箭文物服飾豈似有君鳩集左道符書厭鎮漢上於汝
親則弟也乃畫其形像題其姓名縛手釘心枷鎖杻械仍云請西
岳華山慈父聖母神兵九億萬騎收楊諒魂神閉在華山下勿令
散蕩我之於汝親則父也復云請西岳華山慈父聖母賜爲開化
楊堅夫妻回心歡喜又畫我形像縛手撮頭仍云請西岳神兵收
楊堅魂神如此形狀我今不知楊諒楊堅是汝何親也包藏兇惡
圖謀不軌逆臣之迹也希父之災以爲身幸賊子之心也懷非分
之望肆毒心於兄悖惡之行也嫉妬於弟無惡不爲無孔竅之情
也違犯制度壞亂之極也多殺不辜豺狼之暴也剝削人庶酷虐

之甚也唯求財貨市井之業也專事妖邪頑嚚之性也弗克負荷
不材之器也凡此十者滅天理逆人倫汝皆爲之不祥之甚也欲
免患禍長守富貴其可得乎後聽與其子同處煬帝卽位禁錮如
初宇文化及之弑逆也欲立秀爲帝羣議不許於是害之并其諸
子

庶人諒字德章一名傑小字並錢開皇元年立爲漢王十二年爲
雍州牧加上柱國右衛大將軍轉左衛大將軍十七年出爲并州
總管帝幸溫湯而送之自山以東至于滄海南距黃河五十二州
盡隸焉特許以便宜不拘律令十八年起遼東之役以諒爲行軍
元帥至遼水師遇疾疫不利而還十九年突厥犯塞以諒爲行軍
元帥竟不臨戎文帝甚寵愛之諒自以居天下精兵處以太子讒
廢居常怏怏陰有異圖遂誣帝云突厥方強太原卽爲重鎮宜修

武備帝從之於是大發工役繕修器械貯納於并州招集亡命左
右私人殆將數萬王頊者梁將王僧辯之子少倜儻有奇略爲諒
諮議參軍蕭摩訶者陳氏舊將二人俱不得志每鬱鬱思亂並爲
諒親善及蜀王以罪廢諒愈不自安會文帝崩使車騎屈突通徵
之不赴遂發兵反總管司馬皇甫誕諫諒怒收繫之王頊說諒曰
王所部將吏家屬盡在關西若用此等卽宜長驅深入直據京都
所謂疾雷不及掩耳若但欲割據舊齊之地宜任東人諒不能專
之乃兼用二策唱言楊素反將誅之總管府兵曹河東裴文安說
諒曰井陘以西是王掌握內山東士馬亦爲我有宜悉發之分遣
羸兵屯守要路仍令隨方略地率其精銳直入蒲津文安請爲前
鋒王以大軍繼後風行電擊頓於霸上咸陽以東可指麾而定京
師震擾兵不暇集上下相疑羣情離駭我卽陳兵號令誰敢不從

旬日之間事可定矣諒大悅於是遣所署大將軍余公理將兵出
太谷以趣河陽大將軍慕容良出滏口以趣黎陽大將軍鄧建出井
陘以略燕趙柱國喬鍾馗出雁門署文安爲柱國紇單貴王聃大
大將軍茹茹天保侯莫陳惠直指京師未至蒲津百餘里諒忽改
圖令紇單貴斷河橋守蒲州而召文安文安至曰兵機詭速本欲
出其不意王旣不行文安又反使彼計成大事去矣諒不對於是
從亂者十九州乃以王聃爲蒲州刺史裴文安爲晉州薛粹爲絳
州梁菩薩爲潞州韋道正爲韓州張伯英爲澤州遣僞署大將軍
常倫進兵絳州遇晉州司法仲孝俊之子謂曰吾曉天文遁甲今
年起兵得晉地者王孝俊聞之曰皇太子常爲晉王故曰晉地非
謂反徒也時潞州有官羊生羔二首相背以爲諒之咎徵煬帝遣
楊素率騎五千襲王明紇單貴於蒲州破之於是率步騎四萬趣

太原諒使趙子開守高壁楊素擊走之諒大懼拒素於高澤屬天
大雨諒欲旋師王頴諫曰楊素懸軍士馬疲弊王以銳卒親戎擊
之其勢必舉今見敵而還示人以怯阻戰士之心益西軍之氣願
必勿還諒不從退守清原素進擊之諒與官兵大戰死者萬八千
人諒退保并州楊素進擊之諒乃降百寮奏諒罪當死帝曰朕終
鮮兄弟情不忍言欲屈法恕諒一死於是除名絕其屬籍竟以幽
死先是并州謠言一張紙兩張紙容量小兒作天子時僞署官告
身皆一紙別授則二紙諒聞謠喜曰我幼字阿容量與諒同音吾
於皇家最小以爲應之子顥因而禁錮宇文化及弒逆之際遇害
煬帝三男蕭皇后生元德太子昭齊王暕蕭嬪生趙王杲
元德太子昭煬帝長子也初文帝以開皇三年四月庚午夢神自
天而降云是天神將生降寤召納言蘇威以告之及聞蕭妃在并

州有娠迎置太興宮之客省明年正月戊辰而生昭養於宮中號
大曹王三歲時於玄武門弄石師子文帝與文獻皇后至其所文
帝適患腰痛舉手馮后昭因避去如此者再三文帝歎曰天生長
者誰復教乎由是大奇之文帝嘗謂曰當為爾娶婦應聲而泣文
帝問其故對曰漢王未昏時恒在至尊所一朝娶婦便則出外懼
將違離是以啼耳上歎其有至性特鍾愛焉年十二立為河南王
仁壽初徙為晉王拜內史令兼左衛大將軍轉雍州牧煬帝即位
便幸洛陽宮昭留守京師及大業元年帝遣使者立為皇太子昭
有武力能引強性謙冲言色恂恂未嘗忿怒其有深可嫌責者但
云大不是所膳不許多品帷席極於儉素臣吏有老父母必親問
其安否歲時皆有惠賜其仁愛如此明年朝於洛陽後數月將還
京師願得少留帝不許拜請無數體素肥因致勞疾帝令巫者視

之云房陵王為崇未幾而薨時年二十三先是太史奏言楚分有
喪於是改封越公楊素於楚及昭薨日而素亦薨蓋楚同分也
詔內史侍郎虞世基為哀冊文帝深追悼之昭妃慈州刺史博陵
崔弘昇女後秦王妃以蠱毒獲譴昭奏曰惡逆者乃前婦之姑請
離之乃娶滑國公京兆韋壽女為妃昭有子三人韋如生恭皇帝
大劉良娣生燕王倓小劉良娣生越王侗倓字仁安敏慧美姿容
煬帝於諸孫中特所鍾愛常置左右性好讀書尤重儒素造次所
及有若成人良娣早終每忌日未嘗不流涕嗚咽帝由是益奇之
字文化及弑逆之際倓覺變欲入奏恐露其事因與梁公蕭鉅千
牛字文晶等穿芳林門側水竇入至玄武門詭奏曰臣等中惡命
懸俄頃請得面辭死所無恨冀見帝為司宮者不得聞俄
而難作遇害時年十六

越王侗字仁謹美姿容性寬厚大業三年立為越王每巡幸侗
常留守東都楊玄感反與戶部尚書樊子蓋拒之事朝於高陽
拜高陽太守俄以本官留守東都十三年帝幸江都復令侗與金
紫光祿大夫段達太府卿元文都攝戶部尚書韋津右武衛將軍
皇甫無逸等總留臺事字文化及之弒逆文都等議尊立侗大赦
改元曰皇泰謚帝曰明廟號世祖追尊元德太子為孝成皇帝廟
號世宗尊其母劉良娣為皇太后以段達為納言右翊衛大將軍
攝禮部尚書王世充為納言左翊衛大將軍攝吏部尚書元文都
為內史令左驍衛大將軍盧楚亦內史令自無逸為兵部尚書
右武衛大將軍郭文懿為內史侍郎趙長文為黃門侍郎委以機
務為金書鐵券藏之宮掖于時洛陽稱段達為天子未幾宇文
化及以秦王浩為天子來次彭城所經城邑多從逆當
侗遣使

者蓋琮馬公政招懷李密密遂請降侗大悅禮其使甚厚即拜
密為太尉尚書令魏國公令拒化及仍下書曰我大隋之有天下
於茲三十八載高祖文皇帝聖略神功載造區夏世祖明皇帝則
天法地紀一華戎東暨蟠木西通細柳前踰丹徼後越幽都日月
之所臨風雨之所至圓首方足稟氣食毛莫不盡入提封皆為臣
妾加以寶貺畢集靈瑞咸臻作樂制禮移風易俗智周寰海萬物
咸受其賜道濟天下百姓用而不知世祖往因歷試統臨南服自
居皇極順茲望幸所以往歲省方展禮肆覲停鑾駐蹕按駕清道
八屯如昔七萃不移豈意釁起非常逮於軒陛災生不意延及冕
旒奉諱之日五情崩殞攀號荼毒不能自勝且聞之自古代有屯
剗賊臣逆子何世無之至如字文化及世傳庸品其父述往屬時
來早沾厚遇賜以昏媾置之公輔位尊九命祿重萬金禮極人臣

榮冠世表徒承海岳之恩未有涓塵之答化及以此下
材夙蒙顧
賜出入外內奉望皆輝昔陪藩國統領衛兵及從才皇
祚陪列九
卿但本性兇狠恣其貪穢或交結惡黨或侵掠商貨事
重刑籤狀
盈獄簡在上不遺簪履恩加草芥應至死辜每蒙恕免
三經除解
尋復本職再徙邊裔仍即追還生成之恩昊天罔極將
擢之義人
事罕聞化及梟鏡爲心禽獸不若縱毒興禍傾覆行宮
諸王兄弟
一時殘酷痛暴行路世不忍言有窮之在夏時犬戎之
於周世蒙
辱之極亦未是過朕所以刻骨切心飲膽嘗血瞻天視地
無處自
容今王公卿士庶尹百辟咸以大寶鴻名不可顛墜元
兇巨猾須
早夷殄翼戴朕躬詞守寶位顧惟寡薄志不逮此今老
出黼扆而
仗旄鉞釋衰麻而懷甲冑銜冤誓眾忍淚臨兵指日
征以平大
盜凡化及偽立秦王之子幽遏比於劫囚其身自稱
相專擅擬

於九五履踐禁御據有宮闈昂首揚眉初無慙色衣冠朝望外懼
兇威志士誠臣內懷憤怨以我義師順彼天下梟夷醜族匪夕伊
朝太尉尚書令魏公丹誠內發宏略外舉率勤王之師討違天之
逆果毅爭先熊羆競進金鼓振鼙若火焚毛鋒刃從橫如湯沃雪
魏公志存匡濟投袂前驅朕親御六軍星言繼軌以此眾戰以斯
順舉孽山可以動射石可以入況賊擁此人徒皆有離德京都侍
衛西憶鄉家江左淳人南思邦邑比來表書駱驛人信相尋若王
師一臨舊章蹙覩自應解甲倒戈冰銷葉散且聞化及自恣天奪
其心殺戮不辜挫辱人士莫不道路以自號天踟地朕今復讎雪
恥梟轅者一人拯溺救焚所哀者士庶唯望天鑒孔殷祐我宗社
億兆感義俱會朕心梟戮元兇策勳飲至四海交泰稱朕意焉兵
衛軍機竝授魏公節度密見使者大悅北面拜伏臣禮甚恭遂東

拒化及士貴頗不協未幾元文都盧楚郭文懿趙長文等爲世克所殺皇甫無逸遁歸京師世克詣侗所陳謝辭情哀苦侗以爲至誠命之上殿被髮爲盟誓無貳志自是侗無所關預及世克破李密衆望益歸之遂自爲鄭王總百揆加九錫備法物侗不能禁段達雲定與等十人人見侗曰天命不常鄭王功德甚盛願陛下遵唐虞之迹侗怒曰天下者高祖之天下東都者世祖之東都若隋德未衰此言不可而發必大命有改亦何論於禪讓公等或先朝舊臣或勤王立節忽有斯言朕亦何望神色凜然侍衛者莫不流汗旣而退朝對良娣而泣世克更使謂曰今海內未定須得長君待四方又安復子明辟必若前盟義不違負侗不得已遜位於世克遂被幽於含涼殿世克僭僞號封潞國公有宇文儒童裴仁基等謀誅世克復尊立侗事泄並見害世克兄世渾因勸世克害侗

世克遣其侄行本齋鳩詣侗曰願皇帝飲此酒侗知不免請與母相見不許遂布席焚香禮佛呪曰從今已云願不生帝王尊貴家及仰藥不能時絕更以帛縊之世克僞謚曰恭皇帝

齊王暕字世拙小字阿孩美容儀疎眉目少爲文帝所愛開皇中立爲豫章王及長頗涉經史尤一騎射初爲內史令仁壽中拜揚州總管江淮以南諸軍事煬帝卽位進封齊王大業二年帝初入東都盛陳鹵簿暕爲軍導轉豫州牧而元德太子薨朝野注望咸以暕當嗣帝又敕吏部尚書牛弘妙選官屬公卿由是多進子弟明年轉雍州牧尋徙河南尹開府儀同三司元德太子左右二萬餘人悉隸於暕寵遇益隆自樂平公主及諸戚屬競來致禮百官稱謁填咽道路暕頗驕恣昵近小人所行多不法遣喬令則劉虔安裴該皇甫謐庫狄仲錡陳智偉等采求聲色狗馬令則等因此

放縱訪人家有女者輒矯陳命呼之載入陳宅因緣藏匿恣行淫穢而後遣之仲錡智偉二人詣隴西搆灸諸胡責其名馬得數匹以進於陳陳令還王仲錡等詐言王賜將歸家陳不之知也又樂平公主常奏帝云柳氏女美者帝未有所答久之王復以柳氏進陳陳納之後帝問王柳氏女所在王曰在齊王所帝不悅陳於東都營第大門無故崩聽事楹中折識者以爲不祥後從帝幸榆林陳督後軍步騎五萬恒與帝相去數十里而舍會帝於汾陽宮大獵詔陳以千騎入圍陳大獲麋鹿以獻而帝未有得也怒從官皆言爲陳左右所過獸不得前帝於是怒求陳罪失時制縣令無故不得出境有伊闕令皇甫詡幸於陳違禁將之汾陽宮又京兆人達奚通有妾王氏善歌貴游宴聚多或要致於是展轉亦入王家御史韋德裕希旨劾陳帝令甲士千餘大索陳第因窮其事陳妃

韋氏戶部尚書沖之女也早卒陳遂與妃姊元氏婦通生一女外人皆不得知陰引喬令則於第內酣宴令則稱慶脫陳帽以爲歡召相工徧視後庭相工指妃姊曰此產子者當爲皇后貴不可言時國無儲副陳自謂次當得立又以元德太子有三子內常不安陰挾左道爲厭勝事至是皆發帝大怒斬令則等數人妃姊賜死陳府寮皆斥之邊遠時趙王杲猶在孩孺帝謂侍臣曰朕唯有陳一子不然者當肆諸市朝以明國憲也陳自是恩寵日衰雖爲京尹不復關預時政帝恒令武賁郎將一人監其府事陳有微失輒奏之帝亦慮陳生變所給左右皆以老弱備員而已陳每懷危懼心不自安又帝在江都宮元會陳具法服將朝無故有血從裳中而下又坐齋中見羣鼠數十至前而死視皆無頭陳甚惡之俄而化及作亂兵將犯躡帝聞之顧蕭后曰得非阿孩也其見陳忌如

此化及復令人捕暕時尚臥未起賊進暕驚曰是何人莫有報者
暕猶謂帝令捕之曰詔使且緩兒不負國家賊曳至街斬之及其
二子亦遇害暕竟不知殺者爲誰時年三十四有遺腹子愍與蕭
后同入突厥處羅可汗號爲隋王中國人没入北蕃者悉配之以
爲部落以定襄城處之及突厥滅乃獲之貞觀中位至尚衣奉御
永徽初卒

趙王杲小字季子年七歲以大業九年封趙王尋授光祿大夫歷
河南尹行江都太守杲聰令美容儀帝有所製詞賦杲多能誦之
性至孝嘗見帝風動不進膳杲亦終日不食又蕭后嘗灸杲先請
試炷后不許之杲泣請曰后所服藥皆蒙嘗之今灸願聽嘗炷悲
咽不已后爲停灸由是尤鍾愛後遇化及反杲在帝側號慟不已
裴虔通使斬之帝前而血漉御服時年十二

論曰周建懿親漢開盤石內以敦睦九族外以輯寧億兆深根固
本崇獎王室安則有以同其樂衰則有以恤其危所由來久矣自
魏晉以下多失厥中不遵王度各徇所私抑之則勢齊於匹夫抗
之則權侔於萬乘矯枉過正非一時也得失詳於前史不復究而
論焉隋文昆弟之恩素非篤睦閨房之隙又不相容至於二世承
基茲弊愈甚是以滕穆暴薨人皆竊議蔡王將没自以爲幸唯衛
王養於獻后故任遇特隆而諸子遷流莫知死所悲夫其錫以茅
土稱爲盤石行無甲兵之衛居無早吏爲伍外內無虞顛危不暇
時逢多難將何望哉河間屬乃葭草地非寵逼故高位厚秩與時
終始楊慶二三其德志在苟生變本宗如反掌棄慈母若遺迹及
身而絕固宜然矣文帝五子莫有終其天年房陵資於骨肉之親
篤於君臣之義經綸締構契闊夷險撫軍監國凡二十年雖三善

未稱而視膳無闕恩寵既變讒言間之顧復之慈頓隔於人理父子之道遂滅於天性隋室將亡之效衆庶皆知之矣慎子曰一免走街百人逐之積克於市過者不顧豈其無欲哉分定故也房陵分定久矣而帝一朝易之開逆亂之源長覬覦之望又維城肇建崇其威重恃寵而驕厚自封植進之既踰制退之不以道俊以憂卒寔此之由俄屬天步方艱讒人已勝尺布斗粟莫肯相容秀窺岷蜀之阻諒起晉陽之甲成茲亂常之釁蓋亦有以動之也棠棣之詩徒賦有庠之封無期或幽囚於囹圄或顛殞於鳩毒本根既絕枝葉畢翦十有餘年宗社淪陷自古廢嫡立庶覆族傾宗者多矣考其亂亡之禍未若有隋之酷詩云殷鑒不遠在夏后之世後之有國有家者不可深戒哉元德謹重有君臣之量降年不永哀哉齊王敏慧可稱志不及遠頗懷驕僭故帝疎而忌之內無父子

之親貌展君臣之敬身非積善國有餘殃至今趙及燕越皆不得
死悲夫

